

Twipàcilà Tùsambòmbò

Twà Dimwènekela Dyà

Danyèlè Kùdì Ngabùdyèlè



Kadi ndi mukème bikolè bwa...nsongà yetu mu dinda emu, tuu, nudi bamanyè's, tu-“fèfè,” ne tu-“fifi,” tutekète, twa...nudi bamanyè's, twa bidimu dikumi ne bisambombo atu. Nenku twikàlè tùlwa mu ekeleeziya, nudi bamanyè's, twa bu...Twànà twa bakàji tutekète, twipacila bidimu abi, ntuswè kumwèka tulenga, nudi bamanyè's. Twòtù, nudi bamanyè's, nsuki yònsò myenza mvwàngalà, ku nsongo ya mitu yàtù aku; Mvwa mutùmòne, pàmvwà nyiisha apu, tutùngùnùke anu ne kwinama panshi, kwinama panshi. Kadi, paanyima pàà mutanci, bàvwa bàyèèla lupepèlè bwa kuyùumusha mu mpala, nsuki ya mvwàngalà ayi yònsò myolòlòke.

² Mwànà mukese wa bakàji wa Mwaneetu wa bakàji Downing, nenku—nenku ngààmumònu. Nenku mwànà mukese—mukese—mukese...mukese wa Mwaneetu Collins...Dyèndè nganyì apa's? Kaa...[Mwanèètu kampànda ùdi wàmba ne: “Betty.”—Muf.] Betty, kaa'Betty kànà aku. Ngènjì anu bu wàsekì ndambu, mudìsekèlè's. Kadi ngàmònu twònsò anu tulenga, nudi bamanyè's, tudìlongòlòlè bimpè twònsò, ne pashiishe dyàkàmwè cìvwa...

³ Ee, myoyi yenu yìbeneshiibwe, bananga bàànyì, nudi balenga be, bwànyì mèmè, nansha bìshi. Ncya bushuwa. *Bulenga*, cìdi, cìdi nnyuma mulenga udi wanyisha bwà kulwa kusòmba mu masangisha mushindu awu, ne kutèèleja Evanjeeliyo. Ki cìdi cìvwijà mwànà wa bakàji mulenga ncyòci aci. Ne mèmè ndi ngeela meeji ne mwànà wa balùme kanà yònsò wa cya bushuwa ewu, udi mukùmbànyine kubwela nendè mu dibàka, ùdi wèla meeji amweamwe awu. [Mwaneetu Neville ùdi wàmba ne: “Amen.”—Muf.] Twasàkidila, mukalenge. Abi mbimpè. Muntu kampànda mmutwe ku cyànyì. Aci, ncyà bushuwa. Eyo. Ndi mwitàbùùje ne aci m'Bulelèlè.

⁴ Mpindyewu, kacỳènakù cikèmesha anyì? Ndi mubuulùle buludì mu Danyèlè 9 pàngàabuulùlù Bible wanyì. Mpindyewu, pa ciibidilu ntu ngambila bantu bònsò, bàdi ne mutèèlu mutùbùke disòsò abu ne, bwa kabàvùùlu kàzakù to, nènku ndi ntèkemena ne wànyì pàànyì mutèèlu kì mmutùbùke to. Kadi—kadi nkààdi mumòne cikondo cìmvwà ncỳi mwa kukàvùùla to, bu mùmvwà ne mutèèlu mutùbùke disòsò, cya bushuwa

menemene. Kadi ndi ngeela meeji ne ewu nùnkù kî mmutùbùke disòsò to.

⁵ Mpindyewu, kaa, bwànyì mêmè, twètù tudi. . . ne ndi ngeela meeji bwa batèeleji ne, tudi twanyisha Bwikadi bwa Nyuma Mwîmpè mu dinda emu.

Ne tudi twanyisha bwobùmwè ne bwikadi bwa muntu ne mukwèndè. “Mbilenga be, mbîmpè be, bìdi byenza musànggeelu be, bwa bânà bàà muntu basòmbèle kaaba kàmwè mu bwobùmwè. Ncyenzè bu maanyì a dilaabiibwa a mushinga mukolè àdi àpwekelà ku mwedi wa Aalònà, too ne ku luzemba lwa mùzàbì wèndè.”

⁶ Mvwa muyè bwa kudya leelu ewu, ku Blue Boar kwàka, kadi bângàayi kasanganamu mbanganyi's anu Mwaneetu Bill ewu, ne Mwaneetu wa bakàji Dauch basòmbe mwab'awu, biikàle anu—anu munkaci mwa kusikumina nzòlo ùmwèka mulenga be, mukàlanga mu mushindu wà kacya ncìyikù mwanji kumòna to, ne biikàle anu bàpicila mu cikondo cya dicyònkómoka, bakòpàkànàngàne nendè, nudi bamanye's. Mêmè kubànda mu nzubu wa kuulu kadi kùtwilanganamù ne citùpà cinènè cya ekeleeziya ewu, ki kuswàbo ne bwa kumfucila cyàkudya cya mundaamuunyà. Mpindyewu, abi's bìvwa bilenga bya dikema, ndi ngaanyisha aci.

⁷ Pângàlùkidi kumbèlu, ki Billy ewu ne kashètè kàà tùmata kàvwà muntu kampànda muntwàdile, mufùmìne naakù kule ku ditungà dilenga dya citaleela dya Géorgie kwàka, kùdi citaleela cya menemene aku, mùdìbo bàngambila's, mu cikondo citùdi eci.

⁸ Pashiishe, ndi mutwilàngàne ne nsongààlùmè kampànda pambèlu apa. Mvwa mfùmìna ku miyiiki yànyì ya babidi, mu mapingaja emu, nenku pàmvwà ngenda ndwa mwikàle mpicila lwà ku ekeleeziya kùkaadi dìbà dijimà ne citùpà, nenku mutekète. . . nsongààlùmè mutekète, pambèlu apu, yèyè ne. . . Mêmè kwamba ne: “Kùdi luuyà lukolè be.”

Yèyè ne: “S'lùdiku *bushòwà!*” Mêmè kumanya ne ùvwa wa ku Géorgie, ki yèyè ne: “Ncya bushuwa ne kùdi luuyà lukolè mu Géorgie!”

⁹ Ee, twètù tudi tukèba kwepela mwaba wà luuyà lutàmbe bukolè, kî mmwòmò anyi? Kî citùdi bavwilè kaaba aka ncyôci aci.

¹⁰ Twasàkidilaayi wabûngì, nwènù balunda bàànyì, bwa bwîmpè bwenu bwònsò ebu. Mvwakù mêmè ewu mufwànyine kwenza cinyì bu ncìyi neenù? Ncinyì—ncinyì menemene cîmvwàku anu mufwànyine kwenza bu ncìyi neenù? Bu ne ncìvwakù ne muntu munnange to, muntu nansha umwe kàyikù mufwànyine kutèeleja Mukenji, Mukenji wànyì wònsò kawùvwakù mwa kwikala ne dikwàcisha nansha dikese to. Ncyèna mwa kuWùyìisha makunji a telefone ne micì to.

Byôbì abi kí mbifwànyine kuwùmwa to. Pa nanku bidi bikèngela ciikalè bantu munùdi nwènù aba, biikalà mwa kulwa kuwùtèèleja. Kadi panùdi nulwa nusòmba mu mwaba wà luuyà lukolè bu ewu, ne kwikàle. . . Mukàjàànyì ùvwa wàmba ne ùvwa anu bu wa kuuvuluka makòba lwà paanyima pààpa, mu dinda emu. Kadi pa kumòna bantu, misangu mikwabo babèèdi, basòmba mu masangisha awu mushindu awu, Nzambi ànùpèèshèku nzùbu mu—mulenga, mulenga kumòna mu Butumbi, ki disambila dyànyì ndyôdi adi. Ne ndi anu ntèkemena ne ngeeyemena ne Yèyè neénzè nanku.

¹¹ Mpindyewu, twànji tùmonebi. Kàzakù kàànyì, muntu mmukàngate mwab'ewu. Nanku bikèngela mbalèku ndambu dilòlò edì. Mbanganyì bàdi citùpà cya kumpala cya cyôci eci cibàsànkisha? [Disangisha didi dyàmba ne: "Amen."—Muf.] Kaa, bu ne kakùvwa anu luuyà lukolè nanku to, tuvwa mwa kutungunuka anu ne diya, anu nanku too ne mùdi lumingu lùjika, ne—ne Mukàndà wà Bwàkabuulwibwà. Mémè ndi muWùngè be. Mu Wòwò awu ki mùndi ne mwoyi. Nanku nùsambilàayikù, mu mushindu kampànda, mémè, lumingu elu, bwalu dyàlumingu dilwalwà ndi. . . Bu Mukalenge mwa kwanyisha, bikèngela nkafikè ku cyôci aci, kutèèka mbingu ayi kaaba kàmwè. Ne cyôci aci ncintu cìndi ncìyi mumanyèku kantu nansha kàmwè to. Ne pa nanku nèngiikalè anu mwa kweyemena Mukalenge bwa ne Yèyè neikalè ne dyandamuna bwànyì mémè.

¹² Nanku nkàadi—nkàadi mubalè bantu kabùkabù bashiilàngàne bàtù—bàtù baakùlepù, bàtù bafùndepù. Ndi mubalè mèyi a kwinshi kwa mabeji kaaba aka, a Docteur Scofield, mumanyi munene wa dibàla, kadi ncyà bushuwa ne ncivwa mwa kutwà ku cyèndè to, pa àbùngì a ku mèyi èndè a kwinshi kwa mabeji, bwalu ncyèna mwa kucimòna mushindu awu to. Mwaba awu. . . Bikèngela bwa—bikèngela bwa cyôci kuvwija cimfwànyì cijaalàme.

¹³ Mpindyewu, wèwè ulamakaja puzzle, ne katanci aka, wamba ne: "Kaa, eci cyaaya lwà kuulu *eku*. To, ndi mutwishiiibwe ne eci cidi cikumbana lwà kuulu *eku*." Ee, bikèngela ùtangilè lwà kaaba aka ku citentwidi cyebe, bwa kumòna cyùdi wenza aci. Nanku dîbà adi wèwè—wèwè kùyi wènzà nanku to, neùpetè dinaya dyebe adi dibwelàkànàgàne dyònsò.

¹⁴ Kadi ambà tũng bu wèwè mwa kwangata. . . mwikàle ne dizòla dya mpàta kampanda munene, mulenga, kadi ngombe ùdila bisoosà ku lusongo lwà mucì? Mpindyewu, aci kí ncifwànyine kwikala cijaalàme to (mmwòmò anyì?), bwalu yèyè kàtu ùdila bisoosa ku lusongo lwà mucì to. Pa nanku, ki mùdibi pàdibi ne, wèwè, Nyuma Mwimpè kàyi mutwàngàje Mufundù awu to. Dîbà adi, wèwè udi ne cimfwànyì mu kaabujimà, cinènè cya bupikudi. Ki citùdi twètù baswè, Bulelèlà abu. Ne patùdi anu katùyi bamanyè Bulelèlà to, netùcilekèlè anu nanku. Kadi dîbà adi, pàatùpèèshà Nzambi Bulelèlà, ee, dîbà adi nèngàakulépu.

15 Nudi bamanyè cìdi bwalu anyì? Ngeela meeji ne Mwaneetu Roy Slaughter ne—ne bàmwè bàà bikondo bya kale mwab'ewu, bààkabangà kale wàwa kùkaadi ntàntà mule abu . . . Kùkaavwa bu, ngeela meeji, bidimu bisatu anyì binaayi bya kumpàlà bya mudimu wànyì wà bwambi, ku tabernacle eku mene, ncìvwakù nansha mufwànyìne kuyiisha pa cyena-bwalu cya iferno to, bwalu ncìvwa mwa—mwa kuumvwa ní cìvwa mmwaba wà wùlàkuka kapyà, anyì ní cìvwa ndukità to. Ne musangu wònsò wùvwà Dìyi dyàmba ne, *lukità*, mwva mpeta dikùdimuna, dyàmba ne, “*Hadès.*” *Hadès* “ndukità.” Musangu wònsò wùvwà Di dyàkula bwa iferno: “*Hadès, lukità.*” Nenku mwva ncìshìya anu nanku too ne pàmvwà njandula cya bushuwa cìmvwà ngamba aci, pashìishe ki mèmè kuyiisha pa iferno, pa nanku pànggàakajandulà cya bushuwa cimfwànyì mu kabujimà ki mèmè kumòna mwaba wùvwàci. Bwalu, ndi ndyùmvwà ne mwambi mmwambùle bujitu kumpàlà kwa Nzambi, bwa cìdiye wàmbara disangisha adi aci, bwalu bòbò nebàshaalè anu kacya bààkwàta ku cyòci aci. Nenku, dìbà adi, ambàayi tũng bu mèmè mwa kubàfikisha ku dishàala bakwàte mwaba wùdi kawùyi wòwò, ne kulwakù dìbà dya ciine cìdìbo bakwàte aci kacìciyi cìshìndama? Nwamònu anyì?

Nenku mu cìkèenà-kumòna cìvwa Mukalenge mumpèeshe aci, kùkaadi cikondo kampànda, pàvwà miliyò ayi . . . pàvwà Yèyè awu wàkula naanyì apu, wàkamba ne: “Neùlumbulwishiibwè, dyàmbedi, ku Evanjeeliyo ùdi muyiishè.”

16 Mèmè kwamba ne: “Mèmè ndi nyiisha cintu anu cimwecimwe cìvwà Pòlo muyiishè, ne bakwabo bònsò aci.”

17 Ki mèyi miliyò yònsò awu kwelawù lubilà lukole ne: “Pa cyòci aci ki patùdi bashìndàmèene.” Ki cìvwàci. Nwamònu anyì? Cya bushuwa.

18 Pa nanku ndi muswe kutũngunuka dilòlò edi, mpindyewu, pa nanku katwàkutàmba kunènga to. Nenku mpindyewu kanùpukù mwoyi to . . . Mpindyewu, mu dinda emu . . . Ndi ne tuntu tukese tufùnda mwab'ewu. Mu dinda emu mwva mwakùle pa Danyèlè mu bupika, Ngabùdyèlè ùlwa kùdiye ùmuleja kulonda kwa njila pa matùkù àcìvwà àlwa. Ki citùvwà balongè mu dinda emu, dileeja dya njila pa matùkù àcìvwà àlwa.

19 Mpindyewu, dilòlò edi, tudi twakula pa *Twipàcìlè Tùsambòmbò Twà Dimwènekela Dyà Danyèlè Kùdi Ngabùdyèlè*. Dyàlumingu dyàlondà, bu Mukalenge mwa kwanyisha, ditèekà dya mbingu makumi mwandamutekète pa myaba yàyi, mwaba wùdi muyikumbèene, mu citùpà cya cikondo aci. Kadi tudi biimàne penyi? Mpindyewu, bu twètù anu mwa kupeta cyòci aci ne kucìvwija cya cijaadikìibwe, cilelèlè, dìbà adi netùmanyè anu menemene dìbà ditùdi ne mwoyi. Mpindyewu, katwàkumanya dìbà dyàlwà Ye to; muntu nansha umwe kàakumanya aci to. Yesu

kî mmucimanyè to, Yèyè mwine. Wàkamba ne Kàvwa mumanye to. Wàkamba ne anu Taatù, nkàâyendè, ki uvwa mumanye aci. Nansha Banjelo biine kî mbacimanyè to. Nansha umwe wa kutùdi kî mmumanye dîbà dyàlwàYe to, kadi tudi mwa kumanya dî—dîbà ditùdi . . . cikondo citùdi ne mwoyi, kumanya anu mutùdi bafwànyine kwikala pabwipi.

²⁰ Mpindyewu, bwa kulamakajakù ndambu ku bitùvwà baambe, bwalu bânà beetu bàdi munkaci mwa kukwàta byôbì ebi pa mikàbà ya mèyi . . . Bisanji bìdi munkaci mwa kunyunguluka mu cibambalu cidi paanyima apa. Ne mikàbà, mu bushuwa bwa bwalu, yidi yitùmiibwa, mu myaba yònsò.

²¹ Mpindyewu, dileesònà dya mu dinda emu edi, paanyima pàà twètù bamanè kumònnonona nshapità mwi4 ne mwi5, pashìishe twètù kwangata . . . kubangila ku nshapità wa 9 wa Danyèlè. Nenu mpindyewu, dilòlò edi, tudi tutùngunuka ne nshapità wa 9 awu. Kumpàlà kwa twètù kukùlenga, twànji twinyikàayi anu mitù yetu bwa katanci bwa kwakulakù ne Mwena Dìyi adi.

²² Nzambi wetù wa ngàsà, tudi batwishiiibwe ne Wèwè udi mumanye meeji mene a mu mwoyi wètù. Wèwè udi mumanye bwa cinyi tudi kaaba aka. Ne Udi mumanye ne katwèna balwè kaaba aka dilòlò edi anu ne bwalu nkaaba kalenga kàà kulwa, bwa kwangata kaadiikisha kakese bwa mappingaja aa nansha. Taatù, ncyèna ngeela meeji ne kùdi muntu nansha umwe kaaba aka udi ne kiipacilà aku to. Ndi ngiitabuuya ne tudi kaaba aka dilòlò edi mbwalu tudi ne meeji matòòke a menemene, twambilamù, ne baswè kumanya EMU MMÛDÌ MUKALENGE WÀMBA.

²³ Tudi baKunangè, Mukalenge, ne tudi banangè Dìyi Dyebe. Ne piikalàbi ne mwaba ewu ùdi Wèwè mutùlongòlwèle ewu, anu musàkà cyanàànà mwasa kuulu kwa mutù wètù, ne màdyòtò a nshàamendà aa, tudi ne kusàkidila Kùdi bwa kaaba aka. Bwalu, tudi twitabuuya ne kùdi Cisòmbedi dyàmwàmwà dya dyulu, kutùyayà bàtàngile aku. Kadi tudi tuvùluka bankambwa beetu bàvwà kabàyiku nansha ne diine dyèsè edi to, ne aci cidi cyènza ne myoyi yetu yinamè miikàle mikwàcike bundù, Mukalenge, bwa patùdi mene tudyàbakeena apa.

²⁴ Mpindyewu, Taatù, tudi tulòmba bwa Ûtùkàngwilèku Mifundù, dilòlò edi. Lwàku, wenda wendela ku luseke lwa muntu ne muntu wa kutùdi, patùdi twenda tupweka ne njila ewu dilòlò edi apa. Akùlàku neetu muWàkaakulà ne bàvwà bàya ku Èmawùsè, bàfùmina ku Yèlusàlèma abu. Bwa ne, piikalà disangisha dijikè, dilòlò edi, twamònakù mwa kwalukila ku mbànzà yetu mishiièshiièlàngàne twenda twamba ne: “Myoyi yetu kayivwakù yilàkuka kapyà munda mwetu patùvwà tuMuumvwa wàkwila ku Dìyi Dyèndè apu anyi!”

²⁵ Bèleshàku kubala eku. Bèleshàku didyènzeja dyànyì dya butekète edi, Mukalenge. Kàngulà mukana mwànyì bwa cidi cilelèlè, ne ùmùbwikidijè bwa cidi cibi. Ne dyàngacilèku Wèwè

mwine butùmbi, ne butùmbi mu cisàmbà Cyebe, bwa kumònabò dîbà ditùdi ne mwoyi ne Dilwa dya Mukalenge Yesu dikaadi pabwîpì adi. Bwalu, tudi tulòmba nunku mu Dîna Dyèndè—Dyèndè, Dîna dya Yesu Kilisto. Amen.

²⁶ Mpindyewu, bwa kwalukilakù pa Mifùndù yetu bwa katanci kakese, tudi tusangana ne Danyèlè ùkaavwà mu bupika mwenzèmu bidimu kî mbîngi kî mbîngi makumi asambombo ne mwandamukùlù. Anji elàâyibì meeji pa bwalu abu! Mpindyewu, wêwè ne dibeji dyebe ne crayon webè, wêwè uvwa kùyi mucipetè mu dinda emu awu, udi mwa kubyàngata dilòlò edi. Kuumukila ku cidimu cya 606 cya bikondo byetu ebi too ne ku cya 538. Umùshilaayi 538 ku 606, nudi nupeta bidimu makumi asambombo ne mwandamukùlù bikaavwà Danyèlè mwenzè mu . . .mwikàle mupika; kàyikù ne ekeleeziya wa diya, kàyikù ne mayiisha a ditèeleja, cintu nansha cimwe. Kadi ùvwa ne mikàndà kampànda, mikàndà mivùnga, yivwa mupròfetà uvwa mumudyànjidìle mwambe mu cipròfetà, ne mwine awu ùvwa—ùvwa n'Yelèmiyà.

²⁷ Mpindyewu, pàcìvwàye anu ùlonga Mifùndù apu, kumònayè ne dîbà dikaavwa dyènda dijika, ne cikondo cya bidimu makumi mwandamutekète. . .Ne kakùyi tuseku to Danyèlè ùvwa witabuujà dîyi ne dîyi òvwa Yelèmiyà mupròfetà awu mwambe. Ne mèmè ndi ngambila kàlaasà kàànyì aka, dilòdò edi ne: Bìvwa bikèngela twètù kwitabuujà bapròfetà beetu anyi? [Disangisha didi dyàmba ne: “Amen.”—Muf.] Eyowa's, mukalenge. Bwalu, Dîyi dya Mukalenge òvwa dilwa kùdi bapròfetà. Bòbò mbàdi ne EMU MMÛDÌ MUKALENGÈ WÀMBA. Ne mupròfetà mulelèlè kàtukù ùseesuka ku—ku dîyi dya mukwabo mupròfetà to. Kacya bòbò kabàtukù bènza bwa Dyòdi kwamba cidiDi kadiyi dyàmba nansha. Nebàmbe menemene anu cidi mupròfetà mulelèlè mwambe, aci ki cidi cyènza ne yèyè ikalè mupròfetà. Dîbà adi pàdibo bàpeta aci, ne pashiishe bàdyànjila kwamba ciikalà ne cya kulwa, bamanyè eci, biikàle ne diciina mu mwoyi wàbò, bwa kabàlu kwamba cintu kampànda cya mafi cya cifwànyine kupàmbwisha muntu kampànda. Twètù katùtukù baswe kwenza nanku nansha. Tudi baswe kakùyi mpatà to kwikala batwishibwe ne tudi ne Dîyi dya Mukalenge kumpàlè kwa kwamba EMU MMÛDÌ MUKALENGÈ WÀMBA. Nwamònu anyi? Cidi ne cya kwikala mukenji wà kawùyi wà kwela mpatà to, wùfùmina buludì ku Nkwasa wa butùmbi wa Nzambi, bwa cyanàànà kabìvwa bikèngela twètù kuwàmba nansha.

²⁸ Mpindyewu, pàcìvwàye anu ùlonga Mifùndù apu, kumònayè ne bidimu makumi mwandamutekète abi bikaavwa byènda bìjika. Pa nanku, bu mùkaavwàyemù bidimu makumi asambombo ne mwandamukùlù, kushààle bidimu bibidi kumpàlè aku too ne pàvwà Nzambi mwa kwaluja cisàmbà Cyèndè mu buloba bwàbò.

Pàcìvwàye mu disambila apu, tudi tusangana ne kwàkalwa Mwanjelo wa bukole mufumine mu Dyulu. Kùdikù muntu mwa kuvùluka dìnà Dyèndè anyi? [Disangisha didi dyamba ne: “Ngabùdyèlè.”—Muf.] Ngabùdyèlè. Ne Yèyè ki Mwanjelo bwa ekeleeziya wa beena Yudà. Mbanganyi bàdi bamanyè nanku awu? Myaba yònsò, n’Ngabùdyèlè. Ngabùdyèlè mmúsànjeelà kùdi ekeleeziya, ekeleeziya wa beena Yudà; wàkalwa kùdi Mariya; Wàkalwa kùdi Zakàayi. Misangu yònsò, ùtu anu n’Ngabùdyèlè. Ne Yèyè ùdi umwe wa ku Banjelo banene bàà mu Dyulu. Ne Yèyè kàakatwàdilakù Mwaneetu Danyèlè mwoyi mulenga wà dikema wà kùdi Nzambi anyi! “Kaa, Danyèlè, mutàmbe kunangiibwa!”

²⁹ Aci kí ncifwànyìnekù kukwenza bilenga, pa kwela meeji ne Nzambi mmukunange? Bu ne mèmè ncìvwa munangiibwe bikole to, mvwa anu mufwànyine kuswa kumanya ne ndi munangiibwekù ndambu Kuulu kwàka, kadi nwènù? Bushuwa. Anu mu mushindu kampànda wà ne...Yèyè ùdi wèlakù meeji kùndi, ku musangu ne ku musangu, s’ncifwànyine anu kwenza ne nswè kwela mbilà, pa kwela meeji ne Yèyè ùdi mene wela meeji kùndi. Ne twètù tudi ne ditwishiibwa dya ne Yèyè ùdi ùtwèlela meeji cya bushuwa, bwalu: “Patùcìvwà bangènzàmpèkààtù, Kilisto wàkafwà pa kaaba keetu,” mwaneetu. Nenku, mpindyewu, twètù tuvwa beenyi kule ne Nzambi, mpindyewu mmutùseemèjè pabwìpi ne Nzambi ne mutùpèèshe cyeyà cya lupàndù lwetu, mbwena kwamba ne, Nyuma Mwìmpè. Ne biikàle ne diitabuuja muntwamu didi ditùtùntumunà kumutù kwa bintu bya pa buloba, ne twètù biikàle tubànda kumutù kwàbì. Aci’s ncyà butùmbi’s. Kí mmwòmò anyi? Eyo.

³⁰ Pàcìvwàye mu disambila, Ngabùdyèlè kulwaYè kumwambila ne kakùvwa anu bidimu bikwabo bibidi bishààle kumpalà kwa kwalukilabò mu buloba bwàbò to, kadi wàkamwambila kùvwà ditùngà adi diya mu kaabujimà. Anjì elàayibi meeji ku bwalu abu! Kùvwàbò bàya mu kaabujimà, lwendu lwònsò lwà pa buloba, Ngabùdyèlè wàkalùumvwija Danyèlè. KwambaYè ne Úvwa mutùmiiibwe bwa kwambila Danyèlè cintu cinène eci. Mushindu mwine wùvwà mupròfètà awu ne cya kwikala mudyùmvwè’s wè! Ki kumwambilaYè ne kùvwà mbingu makumi mwandamutekète mikòsela cisàmbà, too ne ku dikùmbana dya maalu ónsò; ki cikondo cya nshìikidilu ncyòci aci, pa nanku byònsò mbijikè, dikùmbana dya maalu ónsò. KwambaYè ne: “Kùdi mbingu makumi mwandamutekète.”

³¹ Bàmwè bantu bàdi bàcibala ne nngondo, bàmwè ne mmatùkù, bàmwè...Huh! Yòyi miikàle anu mbingu yetu ya cya bushuwa eyi, kùdi anu bidimu bitwè ku bibidi ne cyabinaayi cimwe, anyi cidimu cimwe ne cyabinaayi cimwe. Nenku, nwamònu’s, nudi...Ki pàdìbi bikèngela twètù kupeta mpòpò apu, bwa kwikala ne bulelela.

32 “Mbingu makumi mwandamutekète mmikòsela cisàmbà cyebe.” Mu kiipàcilà kaayi? Bwa cinyi? Cisàmbà civwàbo bayikòsèle civwa ncyà nganyi? Cisàmbà cya Danyèlè, beena Yudà. Ne bàvwa bayikòsèle cinyi? Kí ng’anu Danyèlè nkàâyendè to, kadi ne cimenga cya cijila cya Danyèlè; nwamònu’s, cimenga cya cijila cya Danyèlè. Mpindyewu, nwènù kàlaasà, cimenga cya cijila cya Danyèlè civwa ncyèpi aci? [Disangisha didi dyàmba ne: “Yelusàlèma.” –Muf.] Yelusàlèma.

33 Nenku mpindyewu netwàngatè, pàmwàpa tùfikèku dilòòlò edi: Yelusàlèma ùvwa penyì? Nganyi wàkiibaka Yelusàlèma? Kacya nukàadikù bakwélèle meeji anyi? Nganyi wàkiibaka Yelusàlèma? Wàkiibakiibwa díbà kaayi? Netùkùfikè, paanyima pàà katanci. Nganyi wàkiibaka Yelusàlèma? Balùmyànà wa yààyà, s’nkaacintu kakese menemene kasokoka mu ditumba’s, kadi ncyà bushuwa ne Cidi cìcyàmba. Eyowa’s, mukalenge. Nganyi wàkiibaka Yelusàlèma, ne yéyè wàkiibakiibwa díbà kaayi? Eyo. Nenku ki cimenga cya cijila cya Danyèlè ncyòci aci.

34 Ne tudi tuumvwa cya bushuwa ne cimenga aci, cikaadi mpindyewu mulawu bidimu binunu bibidi ebi aci, neciibakiibwè ne necijaadikiibwè cyàkàbìdì. Ne dikuukwila dya mu ntempelu nediteekiibwè anu mwàkadidì ku cibangidilu amu. Ncyà bushuwa. Yelusàlèma neikalèku, mpindyewu, ne nekwikalè mulàmbù wà mashi, mulàmbù wà bwàcyàbwàcyà wùfidiibwa cyàkàbìdì anu mwàkadidì ku cibangidilu amu. Netùbwelè bikolè mu cyòci aci, ngeela meeji, dilòòlò edi, anyi byàbúngì byàci.

35 Mpindyewu ndi muswe bwa nùmanyè, nwènù balunda bàanyi, bwa ne, mu dilenga dya byòbì bintu ebi, ndi cya bushuwa munkaci mwa kushiya ku luseke mbingu ne mbingu ya dilongesha. Kadi ndi anu mbilenga mu mushindu kampànda, bwa ne piikalà kuulu mwa kutalala, anyi paanyima ndambu, patwàbwelà mu Bitampì Mwandamutekète abi, Mpànza Mwandamutekète, Mpungi Mwandamutekète ayi, bintu byònsò abi, bwa ngaamòna mwa kuleedilakù ne kwamba ne: “Nudi bavùlùke mbingu makumi mwandamutekète ya Danyèlè ayi anyi? Nudi bavùlùke cikondo cya Ekeleeziya, pààkabàndàci, ne byàkenzekà abi anyi?” Ne mbingu makumi mwandamutekète ya Danyèlè eyi yidi yàngata cikondo cya kuumukila ku dibàndà dya Ekeleeziya too ne ku dyalukila dya Ekeleeziya. Cipòlò aci ncìdiyì yàngata. Mpindyewu, mpindyewu, kì mbingu yònsò makumi mwandamutekète ya Danyèlè to; ncitùpà cyàyì. “Mbingu makumi mwandamutekète mmikòsa.”

36 Mpindyewu, kùvwa twipàcilà tusambombo mu dimumwènekela Dyèndè adi, ùmwambila civwà mwa kwenzeka. Mpindyewu, kùvwa twipàcilà tusambombo mu dilwa Dyèndè amu. Mpindyewu, dilòòlò edi, ngeela meeji ne netùshiilè kaaba aka mu Mifùndù emu mwaba wùtùvwà mu dinda emu awu, mwaba wùvwa twipàcila tusambombo awu. Tudipù. Mpindyewu tudi tusangana ne kùvwa twipàcilà tusambombo, kàmwè kàà ku

twôtò atu. Mpindyewu twangatàayi nshapità wa . . . ne mwinâyi, mvensa wa . . . ne mwinâyi. . . mvensa wa 24 wa nshapità wa 9 wa Danyèle.

Nenku mbingu makumi mwandamutekète mmikòsela cisàmbà cyebe . . .

Mpindyewu vùlukàayi ne, ki cyònsò ciikalà naaci lwendu lwenzà beena Izaleela pa buloba apa. Ki yidì mikòsa. Mbingu makumi mwandamutekète nyidì anu mikòsa cyanàànà. Ki yònsò yidì mikòsela beena Yudà.

. . . cisàmbà cyebe ne cimenga cyebe cya cijila, . . .

Ki bwa cinyi, mbingu makumi mwandamutekète eyi, mpindyewu kayinùpicikù to, neyibuululè kubangila ku cikondo aci too ne ku ndekeelu wa beena Yudà, kabidi ne ku ndekeelu wa Yèlusàlèma, too ne piibakiibwàku cimenga cipyacipyà. Mpindyewu, kaa, ndi ntèkemena ne tudi tubwelamù, bimpè menemene ne mu ndòndò dilòlò edi.

. . . mmikòsela cisàmbà cyebe ne cimenga cyebe cya cijila, . . . (Bwa cinyi?) . . . bwa kulekeesha dishipa dya mikenji, . . .

³⁷ CyàkamwambilàYe ncinyi mpindyewu? Ûvwa ùteeta bwa kumanya ntàntà uvwaci mwa kunènga. “Ndi mumanye ne tudi ku cikondo cya nshìikidilu.” Anu mutùdi twètù mpindyewu emu ne: “Mukalenge . . .”

³⁸ Mbanganyi mu kàlaasà aka, dilòlò edi, bàdi biitabuuja ne tudi ku cikondo cya nshìikidilu? Ambàayi ne: “Amen.” [Disangisha didi dyamba ne: “Amen.”—Muf.] Twasàkidilaayi. Tudi ku nshìikidilu. Mpindyewu tudi tuteeta bwa kujandula, ku dikwacisha dya Nzambi ne, anu ntàntà wikalaci mwa kunènga. Mmu dituku kaayi mutùdi ne mwoyi emu? Ki bwalu kaayi tudi twalukila ne twangata bapròfetàa aba, ne bikwabo, ne tuteeta bwa kujandula ne tudi penyì.

³⁹ Nenku ki cyàkenzà Danyèlè. Wàkatàngija mpàlà kùdi Nzambi. Mbanganyi bàdi babalè Danyèlè 9 leelu? Elàayi byanza muulu. Eyo. Nudi numòna disambila dyèndè’s, mwàkenzàye ditonda dyèndè bwa cisàmbà cyèndè, ne ditonda dyèndè bwèndè yèyè mwine. Ûvwa muswe kwikala mutwishìibwe bwa ne ùvwa mujandule dîbà dîvwàbo ne cya kwalukila, bwalu ùvwa muswe bwa kulongolola bantu ku dyalukila adi.

Mpindyewu, cindì nteeta kwenza, mbwa kujandula dîbà ditwàbàndà, ne kulongolola bantu bwa kubàndabò, bàvwà badìlongòlòle abu. Nenku tudi batàngije mpàlà yetu kùdi Nzambi, ku masambila ne misengeleelu, bwa kujandula ne: “Mukalenge, ndîbà kaayi ditùdi ne mwoyi edi?”

⁴⁰ Tudi bamòne bintu byònsò bishìilèshìilàngàne ebi byènzeka; tudi tumòna bàà pa buloba mu cimvundu cinène. Tudi tumòna ne dîbà dîkaadi pabwipi. Muf-. . . mufundù wùdi ku cimanu,

byònsò byàkambà Nzambi abi. Tudi tuumvwa Mfumu wetù wa ditungà wàmba bwa mvita mikwabo, munkaci mwa kulwa mpindyewu mene. Tudi tuumvwa dîyî didyànjlila kwamba ne: “Mu, kaa, mu mēbà makese paanyima pàà mvita, mbidyànjlila kwamba ne matungà neàshaalè anu lupwishi lwà volcan pa lwôlò.” Ne tudi bamanyè ne tudi naaci.

Pa nanku tudi bamanyè ne, kumpàla kwa aci kwenzekaci, Ekeleeziya ùdi ne cya kwikala muyè. Pa nanku: “Mukalenge, tudi penyî?” Ki bwa cinyî mēmè ndi ngiitabuuja ne Yèyè neàtūmanyishè. Tudi tutàngija mpàlà yetu ku dijandula. Mpindyewu, dyambedi, twánjàayi kujandula.

Mbingu makumi mwandamutekète mmikòsela cisàmbà cyebe, . . . cimenga cyebe cya cijila, bwa kulekeesha dishipa dya mikenji, . . . kujikija mpekaatu, ne kwenza dipungisha bwa bubì . . . kubweja bwakane bwa kashidi, . . . kutwà citampì ku cikèènà-kumòna ne ku cipròfetà, ne kwela Mutàmbe cijila maanyi.

41 Ki civwà twipàcilà tusambombo twa dimwènekelangana dya Ngabüdyèlè ntwòtù atu.

42 Mpindyewu túbangàayi, nomba wa kumpala. Nwènù baswe kucifùnda, nwènù bàdì ne crayons abu. Nombà wa kumpàla: “Bwa kulekeesha dishipa dya mikenji,” ki cintu cya kumpàla aci. Mpindyewu, bwa kulekeesha dishipa dya mikenji dya Izaleela, uvwa mushipe mikenji bwa kushikukila Nzambi, ki ciikalà dyùmusha dya dipeetu dya Yakòbò dya maalu a Nzambi.

Mpindyewu, bwa kupeta cyòci eci, tūbuululàayi mu Loomò. Nshapità wa 11 wa Loomò, kubangila ku mvensa wa 21 wa Loomò 11. Mpindyewu tuyàaya batàngile ku cinyî? “Kulekeesha dishipa dya mikenji.” Loomò 11:21. Eyo.

Bwalu pùikalà Nzambi kàyi mulàminyine ditàmba dya mu bufùki, . . . (Dìvwà diikàle nganyî? Izaleela.) . . . ùdimukè bwa kùikadi . . . kùikadi wàbènga kukulaminyina wèwè peebe.

Mpindyewu, ndi muswe bwa ne, panwikalà baalùkile mu mēènù, nùkabalàayi nshapità mujimà wa 11 ewu. Ndi mbala eci anu bwa . . . Nùfundàayi nshapità mujimà wa 11 awu, ne nùmubalàayi.

. . . wàbènga kukulaminyina wèwè pèèbè.

Mònaaku bwimpè . . . dísù dikolè bya Nzambi, pa aba bàdì badishinde, . . . kadi kùdi wèwè, bwimpè, wèwè mutùngùnùke mu bwimpè abu: bwa cyanàànà wèwè . . . neùkoshiibwè, neùkoshiibwè pèèbè.

Ne bòbò pààbò, bòbò kabàyi batùngùngùke ne kushàala mu bupid- . . . bòbò kabàyi batùngùngùke ne kushàala mu bupidyà, nebàsomekiibwèmu, bwalu Nzambi ùdi ne bukolè bwa kubàsomekamu cyakàbidi.

Nwamònu's, ùdi wàmba ne nekwikalè cikondo cyàkòshiiwbà bàà Bisàmbà bya bendè, ne Izaleela wàlukilamù cyàkàbidi.

Bwalu pùikalàbi ne wêwè uvwa mukòshiiabwe ku—ku mucì wa olèvâ wúwvâ wâ cisuku bilondèshile bufuki awu (bàà Bisàmbà bya bendè), ne wêwè musomèkùabwe bibèngàngàne ne bufuki. . .

Twétù tuvwa babèngàngàne ne bufùki, beenyi, kakùyi luse bwétù twétù, katùyi ne Nzambi, katùyikù ne ditèkemena nansha dikese to. Kadi Nzambi, ku luse Lwèndè, bwa kutùpèèsha mpungà, wàkakòsa Izaleela mwakàne awu bwa dishipa dya mikenji, ne wàkabàsàka ku luseke, disw- . . mucì wâ olèvâ wâ kumbèlu awu, ne wàkabweja mucì wâ olèvâ wâ cisuku, bibèngàngàne ne bufùki.

. . .ku mucì. . .mwîmpè, ambàaku tǔng bôbò aba, bàdì matàmbà a mu bufùki, mwàbèngàbo kusomekiibwa mu mucì wâ olèvâ wâbò sungasunga?

Eyo, tûtungunukàayi ne kubala.

Bwalu mèmè ncyèna muswe to, bàna beetu, bwa nwènú kwikala bapangè kumanya bwalu-busokoka ebu, bwa kanwikadi nwadimòna beena lungenyi mu dikumbana dyenu nwènú biine; difofomijiibwa adi mu citùpâ ndyenzèke kùdi Izaleela, didi dyenzeke kùdi Izaleela, too ne pààbwelâ. . .kaabujimâ kàà bàà Bisàmbà bya bendè.

43 Pàdì anu Nzambi kàyi mujikije ne bàà Bisàmbà bya bendè to, Izaleela uvwâ anu mufofòmijiibwe. Bàakaya kabwela mu mpekaatu too ne ku dishipa dya mikenji kumpàla kwa Nzambi, bwalu Nzambi wàkabàfofòmija mèsù, bwa twétù twamòna mwa kusomekiibwa. Nudi nucyùmva anyi? Mvènsa wa 26 mpindyewu.

Ne pa nanku Izaleela mujimâ neàsungidiibwè: . . .

44 Nzambi wàkabàfofòmija ku bukole bwebe wêwè ne bwànyì mèmè. Kabèèna mwa kumòna to, bwalu Nzambi mmubàfofòmije. Kadi Izaleela mujimâ, Izaleela mulèlèlâ awu, neàsungidiibwè. Cyàkambâ Mwanjelo awu ncinyi? Butùmbi's wè! "Bwa kulekesha dishipa dya mikenji dya Izaleela! Ndi mulwe bwa kukwambila ne nekùlwe cikondo cyàjikâ dishipa dya mikenji dya Izaleela." Nzambi neàkosè ditàmbâ dya cisuku adi, ne neàsomèkè mwómò amu, cyàkàbidi, ditàmbâ dilelèlâ adi.

45 Kaa, cìdi misangu mikwabo citùpisha mwoyi wànyì's, pa kumòna bantu bàdì bakwàte ne bya luse, ne beena dikènga, bàvwâ bakòshiiabwe kuntu kwàka abu, kabàyi bamanyè kùyaayàbo; ne pa kwela meeji mùvwâ Nzambi, mu luse Lwèndè, mwenzè cyòci aci bwa mèmè ewu ngaamònakù mwa kusungidiibwa. Mubàfofòmije mèsù bwa kabàmònu Maasiyâ wabò sungasunga, mubàjike macì bwa kabàpeci mushindu wâ

kuMutèèleja to; kadi pààbò, bàtàngila buludi bishimà Byèndè, ne bàtàngila buludi bishimà Byèndè ne bikwabo bivwàYe wènza's.

46 Maataàyì, ngeela meeji, nshapità wa 12, anyì nshapità wa 8 anyì wa 12, mmwambe ne: “Nansha mùvwà Yesu mwenzè bishimà búngibi amu, kadi bóbò kabàvwakù mwa kwitabuuja to.” Bwalu, Nzambi wákamba ne: “Bàdi ne mèsù kadi kabèèna mwa kumòna, ne macì kadi kabèèna mwa kuumvwa to; bwa kabàlu kumòna ne mèsù àbò ne kuumvwa ne macì àbò, ne Mèmè nçilu kubàkùdimwisha mucìma.” Kadi, bwa twamònakù mwa kupeta mpùngà, Yèyè wàkakòka rìdò e kumupwekeshila pa mèsù a bàna Bèndè Sungasunga, kwipata bàna Bèndè Sungasunga ku mèsà, ne kubàsaka mu dinyaanunuka dya mu Nyuma, bwa Wàmòna mwa kupeta... bwa twamòna mwa kupeta mpùngà wa kwikalakù ne mwoyi, ùtùpèèsha Mwoyi. Mvensà wa 26, cyàkàbìdì.

Ne pa nanku Izaleela mujimà neàsungidiibwè, mùdibi bifundibwe, Nekupatukè Musungidi mu Sionà, ne neàcingululè dipeetù dya maalu a Nzambi ùdyùmusha kùdì Yakòbò.

47 Eyowa, Yèyè nealwe ku Mukùnù wà Sionà, dimwe dya ku matùkù àdì panshi aa. Pa Mukùnà wa Olèvà, bóbò nebàMujingululè, ne Izaleela mujimà neàmanyè ne n'Yèyè. Bwalu bwa bàà Bisàmbà bya bendè nebwikalè bújikè díbà adi. Ditàmbà dyàkasomekàbo adi, Nzambi neàngatè mamuma àkapòòdiibwàku awu. Nenku ditàmbà dya cisuku adi nedìikalè... .

48 Nenku mpindyewu vùlukàayi ne, lwà kuulu eku panùdì nubala apu, Yèyè mmwambe ne: “Byòbì ne muji awu wùvwa wà cijila, ne muji awu wùvwa Muji wà cijila, mamuma àdì àfùminà ku Muji wà cijila awu neàkwamè pààwù mamuma a cijila.” Nenku byòbì ne Muji awu wùvwa n'Yesu Kilisto, Yèyè udi Muji ne Mütòlokù wà Davidì awu; byòbì ne Mwoyi wùvwà mu Yèyè awu, wàkabànda kupicila mu lukòngò lwà beena Yudà ne bààkakòshiiibwakù, ne mèsù àbò àkafomijiiibwa bwa twètù kumòna, nebikengelè bwa nsòmbelu yetu kukùmbananganayi ne Ditàmbà dibènèshiiibwe adi. Kaa, eyowa's, mwaneetu. Aci's ncyà bushuwa.

49 Nzambi ngwàkabàkòsa, ku bukole, ne kubàfomija mèsù bwa twètù twamònakù mwa kupeta mushindu wà kumòna, mutùpèèshe mpùngà. Kadi ki twètù kutwa eku kutwa eku bu ne tudi kampànda. Pòlò ùdì ùbàmbila kaaba aka ne: “Wadimuka, mushindu wùdì wenza ciinè aci awu. Wadimuka! Bwalu piikalà Nzambi kàyi mulaminyine ditàmbà dya cifùkilu, mmunyi mwatàmbàYe kwikala ne luse bwa ditàmbà dya cisuku dikaaadi dimanè... .”

Ki twètù abu tutwà eku tutwà eku, twamba ne: “Ndi Presbytérien! Ndi Méthodiste! Ndi Baptiste! Ndi mwena Mpenta!” Bwa Nzambi abi kabyèna ne cidìbi byàmba to. Bìdi bìkèngela ùlediibwè cyàkàbìdì kùdì Nyuma Mwímpè udi ufùmina mu Muji awu. Kadi Yèyè mmufùmìne. . .

⁵⁰ Mpindyewu, vùlukàayi ne, Yèyè kèna wàkula bwa bàà Bisàmbà bya bendè to. Ndi anu ngeela cyòci eci emu nunku bwa nùmònè mwaba wùdì bàà Bisàmbà bya bendè bàpetela wabò mpùngà.

⁵¹ Kadi, Yèyè wàkalwa bwa “kulekeesha dishipa dya mikenji,” bwa kudijikija. Mpindyewu, twètù baalùkile cyàkàbìdì mu Danyèlè, netùsanganè ne mu Danyèlè amu, tudi tusangana kaaba aka, mvensà wa 24. Eyo. “Bwa kulekeesha dishipa dya mikenji.” Kulekeesha cinyi? Kulekeesha dishipa dya mikenji dya Izaleela.

Dishipa dya mikenji ncinyi? Nkulwisha cintu kampànda. Dishipa dya mukenji wanyi, nkungenzela cintu cibi. Kushipa mukenji wèbè, nkukwenzela cintu cibi.

Pa nanku, Izaleela wàkenzela Nzambi cintu cibi. Kadi mu lumingu lwà makumi mwandamutekète elu, cyènzekà ncinyi? Nzambi neàlekeeshè dishipa dya mikenji dya Izaleela. “Kulekeesha dishipa dya mikenji,” necùkalè, “kucinguluja dipeetù dya maalù a Nzambi kudyumusha kùdì Yakòbò.” Ne díbà adi Izaleela mujimà neàlediibwè cyàkàbìdì. Bònsò nebàpetè Nyuma Mwímpè.

Mpindyewu, nombà mwibìdì, fùndaayi aci pa mabeji ènù apu.

⁵² Tudi bafwànyine kushàalapù ntàantà mule, kadi ncyèna muswe kuditwa mu diciyiisha to. Ndi muswe anu kuyiikila neenù, bwa nwamòna mwa kucyùmva mu ndòndò. Patwàbwelà mu Bitampì Mwandamutekète ebi, díbà adi nenùtungunukè mu dilonga dya Ekeleeziya, dya Bitampì, dya Bipùpù, ne nenùmanyè mwaba wutùdì biimànyine. Eyo.

⁵³ Nombà mwibìdì: “Kujikija mpekaatu.” Tùbalàayi cyàkàbìdì mpindyewu, Danyèlè.

. . . *kulekeesha . . . dishipa dya mikenji, ne—ne kujikija mpekaatu, . . .*

Ki kiipàcilà kiibìdì kàà dilwa Dyèndè. Kàà kumpàla, kulekeesha dishipa dya mikenji dya Izaleela; ne kujikija mpekaatu. Izaleela wàkenzela mpekaatu penyì? Bààkenzela mpekaatu wabò wa lufù penyì? Bààkaditápulula ne Nzambi penyì?

⁵⁴ Mpindyewu tèelejàayi ne ntèmà. Tùbuululàayi mu Maatàayi Munsantu 24. Nenku apa mpààkenzelà Izaleela cilèmà cyèndè cya lufù. Apa mpààkenzelàye mpekaatu wèndè wa ndekeelu, ne ki cidì cyènzè ne yèyè ikalè mu ngiikàdilù wudiyè leelu ewu ewu. Maatàayi, nshapità wa 27 wa Evanjeeliyo wa Maatàayi

Munsantu, ku mvensà wa 25 wa nshapità wa 27. Tùbangilàayi lwà ku mvensà wa—wa 21.

Nguuvènà wàkabàndamuna e kwambayè ne: Ngwèpi wa ku babidi aba unùdi baswe bwa nnùlekèèlè? Ki kwambabò ne: Baalàbààsà.

Mpindyewu vùlukàayi ne, ny'Izaleela awu. "Baalàbààsà!"

Pilaatù kubàambilayè ne: Nèngènzè cinyi... ne Yesu udibò bàbùkila ne n'Kilisto ewu? (Bàtèèlèjàayaaku!) Bònsò e kumwambilabò ne: Bàmupoopèlè pa nkùrusè.

Vùlukàayi ne, ki Maasiyà wabò uvwa Danyèlè mwambe ne uvwa ulwa awu. Vùlukàayi mu dinda emu, mu dìleesònà edi ne: "Yèyè neàkoshiibwè, kaciyi Bwèndè Yèyè mwine to," kàyi ne cidìYe mwenze nansha cimwe to.

... Bàmupoopèlè pa nkùrusè.

Ki nguuvènà kwambayè ne: Bwa cinyi, mbubi kaayi bùdiye mwenzè? Kadi bóbò bàakeela kabidi lubilà lukolè, bamba ne: Bàmupoopèlè pa nkùrusè.

Dìbà adi Pilaatù kumònayè ne kàvwa ne cintu nansha cimwe civwàye muvwanjine kupeta to, kadi... anu mutooyi ngùvwa wènjùbwa, ki kwangatayè màyi, ne kwowayè ku byanza kumpàla kwa musumbà wà bantu awu, wàmba ne: Mèmè ncyèna ne dipùla dya mashi a muntu mwakàne ewu to. nùtangilàayi... bwalu abu.

55 Tèèlejàayi! Ki cilèmà cyabo ncyòci eci. Ki mpekaatu wabò nyèyè ewu.

Dìbà adi bantu... kwandamuna, e kwambabò ne: Mashi èndè ikalè pambidi pèètù, ne pàà bàna bèètù balela.

56 Ki mwaba ngwòwò awu wàkacyènzàbo. Yèyè uvwa munkaci mwa kubàjikijila mpekaatu. Mmunyi mùvwàYe mwa kwenzakù cingà cintu pa kuumusha kubàfwila kwa luse, mumanye ne bìvwa bikèngela bwa kubàfomijaYè mèsù, bwa twamòna mwa kubwela? S'mbyenzè anu bu ne bàna Bèndè Sungasunga bàvwa bàlòmba Mashi Èndè's. Nenku bóbò bàvwa bafòfòmijùbwe, ne Yèyè uvwa mumanye ne bàvwa bafòfòmijùbwe. Ki bwa cinyi Wàkeela lubilà ùbàlòmbela luse. "Bàfwilè luse, Taatù, bwalu kí mbamanyè cidìbo bènzà aci to." Bàvwa mpofo. Mbwa bwalu bwètù twètù bùvwàbo bafòfòmijùbwe. Mu bupidya bwàbò mmwàkènzàbo cyòci eci. Kadi pààMumònàbo cyàkàbidi... Amen!

57 "Kujikija mpekaatu." Mpekaatu ncinyi? Bupidya. Kabàvwa biitabùùje ne uvwa m'Maasiyà awu to. Kabàvwa bafwànyine kumòna ne Yèyè awu ki uvwa Maasiyà to, kadi pààbì's Yèyè wàkenza cimanyinu ne cimanyinu cyònsò civwà Maasiyà ne cya kwenza. Kadi bóbò kabàvwa mwa kucimònakù to. Bàvwa mpofo.

⁵⁸ Pa nanku panùdì numòna bantu bàmba ne: “Mémè ncyéna ngiitabuuja dyondopa dya kùdì Nzambi to. Ncyéna mwa kudimòna to. Ncyéna mwa kumòna dibàtiiza dya Nyuma Mwímpè edi to.” Kanùbàfikidi munda to; bàdi mpofo. Bàdi bàmba ne: “Ncyéna mwa kumòna Mukenji wà Dilwa Dyèndè ewu to. Ncyéna mwa kumòna dibàtiiza dya Nyuma Mwímpè edi to. Ncyéna mwa kumòna dimiinu dya nyòka to. Ncyéna mwa kumòna bintàkanyì ebi to.” Bàdi mpofo, kadi kabàyi bamanyè to. Nùbàsambidilaayi anu cyanàànà. Eyo.

⁵⁹ Mu bupidyà bwàbò amu; kadi, pààmumònàbo, pààlwàYe cyàkàbidì apu, necìjikijè bupidyà bwàbò abu. Kaa, ekelekele! Twànjàayi anu kubuulula mu Genese ku 25, nshapità wa 45, bwa tùpetè ci—cifwànyikijilu cyàci. Ndi mubifunde ndambu kaaba aka, bya mu Genese 45 abi, nwènù bàdì bàfùnda tuubintu pa mabeji abu. Kaa, mushindu mwine wùndì munange Evanjeeliyo mwímpè wa kale ewu’s wè! Eyo. Mpindyewu tudi bamanyè mwaba wutùdì.

Nudi mwa kungumvwa bìmpè anyì, mundekeelu mwa citanda mwàmwà? Ela cyanza muulu pawikalà mwa kungumvwa. Ndi mutèèke eci pabwìpì ndambu.

⁶⁰ Mpindyewu netwikalè mwa kubala citùpà cya Mufùndù ewu. Ndi muswe bwa nùteelejè, nwènù bàdì kanùyì ne Bible abu. Nwènù bàdì ne Bible, n’Genese. Dyambedi, tùbangilàayi mu nshapità wa 44, kubangila ku mvensà wa 27.

⁶¹ N’Yòzefù, ne Yòzefù ùvwa cifwànyikijilu cipwàngàne cya Kilisto. Aci tudi bamanyè. Mbanganyi bàdì bamanyè aci? Mukina kùdì bânà bààbò. Bwa cinyi? bwalu ùvwa wa nyuma, ùvwa ùmòna bikèènà-kumòna, ùmvwija bilòòtà. Yèyè ùvwa muntu wa nyuma munkaci mwa bânà bààbò, nenku kumukinabò. Kadi tatwèndè ùvwa mumunangè.

Ki mùvwà Yesu pèndè mukina kùdì maèkèleeziyà a cyena-màngumba, kadi munanga kùdì Taatù Wendè Nzambi. Bàvwa baMukine bwa cinyi? Bwalu ùvwa wa nyuma. Bwalu... Bàvwa bàmba, bàakamba ne Yèyè ùvwa mwena lubùkù, démon.

⁶² Nudi bavùlùke bânà bààbò ne Yòzefù cyàkamwambàbo anyì? “Ki mulòoci wa bilòòtà awu ulwàlwa ewu.” Nwamònu anyì? Nwamònu’s, cintu cimwecimwe aci. Ki kusùmbishabò Yòzefù pabwìpì ne ku mushinga wumwewumwe wà bwena ùvwa Yudààsà musùmbishe naawù Yesu awu, binjànjà bya argent makumi asatu. Kumwimanshabò mu dijimbà, kadi kuya kambilabò tatwàbò ne cintu kampànda ncimushebèye, mufwè. Kadi kumupàtulabò mu dijimbà amu. Kilisto wàkiimanshìlbwa mu dijimbà, ne wàkapàtudiibwamù. Ne pààkapàtukayèmu wàkaya mu mwaba mutàmbe kutùmbuka wùvwàku pa buloba. Amen! Yòzefù wàkaya ku dyàbalumè dya Pàlò; ne Yesu wàkaya ku dyàbalumè dya Nzambi. Mu diteeciibwa dyèndè,

kumpàla kwa dibàndishiibwa dyèndè... Yesu, kumpàla kwa kubàndishiibwa Yè, wàkpicila ku diteeciibwa.

⁶³ Mona's, ngeela meeji ne ùvwa m' Billy Sunday, mutangadiki munene awu, uvwa mwambe ne: "Ku mucì ne mucì wònsò—wònsò kùvwa kusòmbè Banjelo mùlìyò mujimà, dituku dya dipoopodiibwa dya pa nkùrusè adi, bàmba ne: 'Lekèlèlà anu cyanza Cyebe cyanàànà ùfunkunè kutùdi. Twètù netùshintululè cyalu cidì apa eci.'" Kadi Yèyè kàvwa mwa kucyènza nansha.

⁶⁴ Kayifààsè kwambayè ne: "Mmudisùngile yèyè mwine; bakwabo kaayi kàyi ùbàsùngila." Kàvwa mumanye ne cìvwa nkàalumbandi wèla to. Bu ne Wàkadisùngila Yèyè mwine, nunku kì mMusùngile bakwabo to. Pa nanku, Wàkadifila Yèyè mwine, bwa kusùngila bakwabo. Nwamònu's, mpofo ya dikèma bwa kucimòna. Mpindyewu bôbò. . .

⁶⁵ Nenku pàvwàye kuntwaku mu dibàndishiibwa dyèndè adi apu, anyi, kumpàla kwa dibàndishiibwa dyèndè adi, diteeciibwa dyèndè. . . Vùlukàayi ne, Yòzefù wàkeediibwa mu bùlokò bwalu kàvwa mwenzè bwalu to.

⁶⁶ Kalàlà kàà masalaayi kàà beena Loomò, anyi, kàà beena Izaleela aku, Pootifà; Pootifà wàkaya, ne kuyayè ku lwendu. Ùvwa ne mukàj mulenga kwìsù, ne mukàjèndè awu kubùikidishayè Yòzefù bwa àbwelè mu nzubu bwa kwenzayè cintu kampànda, kadi kuteetayè bwa kufikisha Yòzefù ku dyanza dya bwalu bubì. Kadi yèyè ùvwa ne lulamatu kùdi Nzambi. Ndi nnwàmbila's, bôbò misangu yònsò bàtu anu. . .

⁶⁷ Nwènu bakàji, s' nkàadi munwèlèlèlèlèlè mbilà; mpindyewu nèngiikalè mwa kunwàkwilakù, ndambu. Nwamònu anyi? Mukàji ndupànza lwà lutàmbe kwikala lwà butekète. Ndi mumanye ne kakwèna mwa kwikala mulùme mubi kumpàla kwa kwikalakù mukàji mubi to. Kadi muntu mulùme udi mumanye ne—muntu mulùme udi mumanye ne udi mwànà wa balùme wa Nzambi, kadi ùbwelela pa butekète bwa mukaji, bundù bwebe; cidì mukàji awu wènza nansha ciikàle cinyi. Yèyè ndupànza lwà lutàmbe kwikala lwà butekète, ne wèwè udi mumanye aci. Mukaji yèyè ùpàtuka, wènza maalu kàyi bu inàbànza to, mukwàkè ku cyanza ùyiikilanganè nendè bu mwaneenu wa bakàji. Wèwè's udi mwànà wa balùme wa Nzambi. Kwènji bintu bibì abi to. Tàngilà Yòzefù, yèyè's ùvwa cileejilu kùdi.

⁶⁸ Nenku pàvwà mukàji wa Potifà awu, mukàji mulenga kwìsù awu, wa kuneemeekiibwa, wa milongo ya kuulu menemene, umwe wa ku bakàji bàà milongo ya kuulu menemene bàvwàku mu ditùngà amu, kumusengeleelayè ne kumuswishishayè. Kadi yèyè kukùdimuka, kadi mukàji awu kumukwàta ne kuteetayè bwa kumulamika pambidi pèndè. Ki kudikùpayè too ne mwàkalwàye mene kuvùula cinkutu cyèndè, ne kunyeemayè mukàji awu. Eyowa's, mukalenge. Kadi pàakaalukilàye, kumushiminyinabò bwalu, kwambabò ne yèyè

nguwwa mubwelèle mukaji awu bwa kulààlayè nendè ku bukole, ne kushiyayè . . . ne kushiyayè cinkutu cyèndè mwaba awu. Nenku bwa cyòci aci yèyè kabwela mu kàshò. Kadi, mu kàshò amu, Nzambi nyawu ùvwa nendè, mwaba wùvwàbo bamwelè nansha mwikàle wà bishi.

⁶⁹ Yèyè ùvwa cifwànyikijilu cya Mwànà wa ditanta. Cyònsò cìvwà Yòzefù wènza cìvwa anu cìtanta. Ne pààlukilà Yesu mu Bukalenge bwa bidimu cinunu, ki bwa cinyi bipèèlà nebìsampilè bu cilòngò cya rose. Cyònsò cidiYe wènza necitantè. Yèyè m'Mwànà wa ditanta. Kwònsò kunùvwà nutèka Yòzefù, kùvwa kùbèneshiibwa. Kwònsò kùdi Yesu, nkubèneshiibwe. Pa nanku, Mwangatè mu mwoyi wèbè ùbeneshiibwè.

⁷⁰ Pa nanku mpindyewu, tudi tusangana ne, Yòzefù dîbà adi wàkeediibwa mu bùlokò. Ne mu bùlokò amu mùvwa bantu balùme babidi; umwe wa kùdìbo wàkajìmina, ne umwe wàkasùngidiibwa. Yesu, mu diteeciibwa Dyèndè pa nkùrusè, mwîvi umwe wàkajìmina ne mukwabo wàkasùngidiibwa.

⁷¹ PààkabàndishiibwàYe, Wàkaya ku dyàbalùme dya Nzambi. Pààkabàndishiibwà Yòzefù, wàkaya ku dyàbalùme dya Pâlò, ne muntu nansha umwe kàvwakù mwa kwakula ne Pâlò kàyi mwanji kwakula ne Yòzefù bwa kupeta dyanyisha to.

Ne pàvwà Yòzefù ùmuka mu nzubu wa bukalenge . . . Kàà, ekelekele! Pàvwà Yòzefù ùmuka mu nzubu wa bukalenge, mpungi yìvwa yìdila, ne bantu bàvwa bànyeema kumpalà kwèndè, bènda bàmba ne: “Twàyi binù! Yòzefù nya' wìya!” Amen!

Ne pùùmukà Yesu ku dyàbalùmè dya Mutàmbe bunene, mpungi neyidilè. Ne cinù cyònsò necitwe panshi, ne ludimì lwònsò nelùjikulé ne: “Yesu nya' wìyee!” Bushuwa's! Kadi byòbi ne . . .

⁷² Nenku, vùlukàayi ne, pààkabèngiibwàye kùdi bânà bààbo apu, cyàkenzàye ncinyi? Wàkasèla mukàji wa bàà Bisàmbà bya bendè; wàkasèla mukàji wa beena Èjiipitù. Pààkakòshiibwà Yesu kùdi bânà Bààbò kuntu kwàka, beena Yudà abu, Wàkasèla Mukàji wa bàà Bisàmbà bya bendè. Kadi mpindyewu, paanyimà pàà bidimu, paanyimà pàà bânà bamanè kulediibwa, Efàlàyimà ne Maanàsè, yèyè wàkapeta dîkù.

⁷³ Pashiishe, dîngà ditùkù, bânà bààbò kulwabò bwa kumumwènekela. Tàngilàayi. Tudi bamanyè bwalu-bulonda abu, mwàkeelàye kaacintu kakese muntwamu, bwa kubàpingajayè. Ne mwàkenzàye bu ne kàvwa mumanyèku nansha mwa kwakula mwakulu wàbò to; kwangatayè mwandamunyi, bwa beena Ebèlù abu, pèndè yèyè mwine mwikàle mwena Ebèlù. Pèndè ùvwa mwanaabo uvwa mulwèmu awu. Bòbò kabàyi bàmumanyè to. Ùvwa mfumu wa bukole.

Nenku patùdi twakulangana apa, Kilisto ùdi wèndela beena Yuda, wòndopa babèedi bààbò ne bikwabo, kadi bóbò kabèèna anu bàmanyè ne Yèyè ùdi Nganyì to, Maasiyà awu.

Tùbangilàayi ku mvensà wa 27 wa nshapità wa 44.

Ne musadidi webè taatù wanyì mmutwàmbìle ne: S'nudi bamanyè ne mukàjàanyi ùwà mundelèlè— mukàjàanyi ùwà mundelèlè bàà bàà balùme babidi,

Ne umwe wa kùdìbo wàkaya kunshìya . . .

Ùwà n'Yòzefù, mwine ùwàbò bààkula nendè awu.

. . .ne mèmè kwamba ne: Ncya bushuwa ne yèyè mmusùnsula mushìya tusunya tusunya; ne ncyàkamumònakù to kubangila anu apu.

Kadi nwènù bangumùshe ne ewu kabidi, ne dyàkabi kumufikiladi, nenùbwejè nsukì yànyì ya mvyà eyi ne kanyinganyinga mu lukità.

⁷⁴ Kuyabò ne Benyàminà mutekète awu kuntwaku, mwakùnyèndè awu. Nudi bamanyè udi Benyàminà ùleeja anyi? Musùmbà mupyamùpyà ewu wa beena Yuda balelèlè, bashùwashùwàlè abu bàdi munkaci mwa kudìsanga kuntu kwàka mpindyewu bwa kwenza binunu lukàmà ne makumi anaayi ne binaayi abi, cisà cìdi munkaci mwa kujuuka eci—eci. Kì mbacìnguludi bàà mfranga ya bendè bàà ku Wall Street aba to, to, to; abu ntùmwe tuzòlò twa kumana naatu mikìiyà. Abu kí mbeena Yuda to. Abu kí mbeena Yuda to. Beena Yuda balelèlè mba-Benyàminà batekète bàdi munkaci mwa kujuukilà kuntweku aba, ne kabàyikù nansha banji kuumvwa bàmba bwa Dìyì dya Yesu Kilisto to.

Mpindyewu ki bwa cinyì mulwe kùndì. . .ne taatù webè. . .ne taatù wanyì, ne mwànà wa kambodyoto awu kàyi neetù to, pa kumòna ne mwoyi wèndè mmuswikila ku mwoyi wà mwànà wa kambodyoto awu;

⁷⁵ Mwoyi Sungasunga wà Nzambi mmuswikila ku Izaleela. Yèyè ùdi nendè mu dibàkà. Netùkafikè ku cyòci aci mu tusunsa tukese emu, bu Mukalenge mwa kwanyisha. Yèyè ùdi mu dibàkà ne Izaleela. Mwoyi Wèndè mmuswikila kùdiye. Anu mùndì mèmè muswikila kùdi Màndamù Branham udi paanyimà pàpa wàwa, mukàjàanyi, ne mùdi wèwè muswikila kùdi webè mukàjì amu. Mwoyi wèbè mmuvùngilamù. Ne Nzambi ùdi mu dibàkà ne Izaleela. Nenku cìwà ncinyi? Yakòbò ùwà mwambè ne: “Mwoyi wànyì mmuvùngila ne muswikila mu mwànà ewu. Nèngìkalè mwa . . .”

Nenku nebyènzekè ne, pààmònàye mwànà wa kambodyoto awu kàyi neetù to, . . .

Yòzefù ùwà muswe kulama mwànà wa kambodyoto awu, nudi bamanyè's. Tudi bamanyè bwalu abu.

. . .ne yêyè neàfwè, mwine tatwëndè awu's, nenku basadidi bèèbè nebàbwejè nsukì ya mvyà ya musadidi webè tatwètù awu ne kanyinganyinga ku lukità.

Tèèlejàayi dilòmba didi Luubènà ùlòmba mpindyewu adi.

Bwalu musadidi webè mmulwe cyeyà cya mwânà wa kambodyoto aku webè. . .kùdì taatù wanyì, pa kwamba ne: Mémè ncìyi. . .mukutwàdìleyè to, dîbà adi nêmpetè kadyuwù kùdì taatù wanyì bwa kashidi.

Mpindyewu ki bwa cinyì, ndi nkulòmbakù, swàku bwa musadidi webè àshaalè yêyè pa kaaba kàà mwânà wa kambodyoto awu. . .

Kaa, ekelekele! Nwamònu's, mmwimàne anu kumpàlà kwa Yòzefù mene, mwanaabo awu. S'n'Yòzefù, kadi yêyè kàyi mumumanyè to. Kaa, indilà too ne pààbangà Bukalenge bwa bidimu cinunu abu, mwaneetu!

. . .mpindyewu pa kaaba kàà mwânà wa kambodyoto awu bu mupika wa mukalenge wanyì; . . .

Mutèèlèjaayaaku, mùdìye ùjikula ne, "mukalenge" amu.

. . .ne àlekelèku bwa mwânà wa kambodyoto awu àye ne bânà bààbò.

Bwalu mmunyi mùngààyà kùdì taatù wanyì, mwânà wa kambodyoto awu kàyi naanyi? Bwa ku mpùùkàpùkà ncìikadi ngálwa kumòna bubì bùvwila taatù wanyì.

⁷⁶ Ùsengeleela, ùfila mwoyi wèndè yêyè mwine! Mushindu mwine wimanà beena Yudà abu mwaba awu ne byanza byolola's wè! Tàngilàayi. Tàngilàayi mpindyewu mvensà, wa 45 awu. . . Tèèlejàayi ne ntèmà, kacìnùpìcikù to. "Pàvwà Yòzefù kàyi mwa. . ."

Dîbà adi Yòzefù kupangayè mwa. . .-dikànda— kudikànda kumpàlà kwa bônso bàvwà biimàne nendè abu; . . .

Mwaneetu, dîbà adi's ki dyàjikijiibwà mpekaatu's. Bupidyà nebùye mwamwamwa.

. . .ki kwelaye lubilà, ne kwambayè bwa muntu yónsò ùmukè. . .mwaba wùvwàye awu. Nenku kakwàkashàalakù muntu nansha umwe mwimàne pàmwè nendè to, pàvwà Yòzefù ùdìmanyisha kùdì bânà bààbò apu.

⁷⁷ Ncinyì aci? Nansha mukàjèndè sungasunga wàkaalukila mu nzubu wa bukalenge. Kaa, ekelekele! Mukàji-musèla mu Butùmbi, pààlukilà Yesu (Netùbwelèmu kaaba aka.) bwa kuDimanyisha.

Ki kwelayè cibòbò wa mwadi, . . .

Yòzefù kààkapetakù kabidi mwa kudikànda to, ki kwelayè mukunda.

...ne beena Èjiipitù ne bàà mu nzubu wa Pâlò bààkawùmvwa.

⁷⁸ Too ne lwà mundekeelu menemene mwà nzubu wa bukalenge mwàmwa, kuumwabò Yòzefù wèla mikunda. Mpindyewu, aci cìwva ncifwànyikijilu cya Kilisto útwilangana ne beena Yuda, bwa ne, Yèyè mmumanye ne Yèyè nguvwa mubàfofòmije bwa twètù twamòna mwa kupeta mpùngà. Kadi pààlwàYe cyàkàbìdì kùdìbo, mpekaatu wa Izaleela neàjikè.

Ki Yòzefù kwambilayè bàna bàabò abu ne: Mmémè Yòzefù!...

Nudi nwela meeji ne Yesu neàmbè cinyi? “M’Mémè Maasiya wenù awu. M’Mémè unwàkapoopelà pa nkùrusè awu.”

...taatù wanyi ùcìdi ne mwoyi anyi? Ki bàna bààbò kupangabò ne mwa kumwandamuna, bwalu bààkadyùmvwa batàcishùbwe kumpalà kwèndè.

⁷⁹ Kaa, bikèngela ngùimanè kaaba aka bwa katanci kakese. Tùbuululàayi mu Zekàayi mu nshapita wa 12. Buulùlaayi pàmwè naanyi mpindyewu mu Mukàndà wà Zekàayi, nshapità wa 12 wa Zekàayi. Kadi ndi pàmwàpa ntamba kwangata dìbà dyàbùngì mu kudìtwa mu diyiiisha pa cyòcì eci, kadi ndi—ndi ntèkemena ne kì nnanku to. Ne ndi—ndi muswe nùcyùmwè, njinga nanku ngamba kufwa.

⁸⁰ Zekàayi, twàngatàayi nshapità wa 12 wa Zekàayi, bwa tùmònè cyàmbàYe mpindyewu piìmanàYe kumpalà kwa bàna Bàabò. Zekàayi 12, ku wa 10 aku. “Kujikija mpekaatu,” mpindyewu. Eyo, nshapità wa 12 ku mvensà wa 10.

⁸¹ Mònaayi. Nenku yèyè ùdi wàkula mpindyewu bwa bààshààdìlè; dicincimikiibwa dya Yelusàlèmà; nyama wa lwonji ne bilwilu abi mbyumùshùbwe, ne bikwabo; bintu byònsò mbifikè ku ndekeelu mpindyewu; mpabwìpì ne Bukalenge bwa bidimu cinunu apa, Bukalenge bwa bidimu cinunu pabwìpì ne kubanga mpindyewu mene.

Nenku mémè nèngùcìkijè pa nzubu wa Davidi, ne pa bisòmbèdi bya Yelusàlèmà, nyuma wa (cinyi?) ngàsà...

Amen! Ngàsà udi ukèmesha awu!

...pa nzubu...bàdi basòmbèle mu Yelusàlèmà, (“cimenga cya cijila” cya Danyèlè), nyuma wa ngàsà ne wa misèngeleelu, ne bòbò nebàtangijè mèsu kùndi mémè udìbò batwè difumà, ne nebàmudilè, mùdi muntu ùdila mwanèndè umwèpelè wa balùme, ne nebàmudilè mwadi wà bujindajinda, mùdi muntu ùdila bujindajinda bwa mwanàabutè wèndè.

⁸² Tèèlejàayi, madilu miine ìkalàku piìkalàYe mwimàne mwaba awu, mwikàle ùDimanyisha kùdìbo, mwàkenzà Yòzefù amu! Tèèlejàayi.

Nenku *mu ditùkù adi nekwikalè madilu manene a menemene mu Yêlusàlèma, byenzè bu madilu a Haadàd- . . .*

Ncyêna mumanye mwa kushindumuna dînà adi to, H-a-a-d-à-à-d-è-l-ì-m- -ò- . . .

. . . *Haadàdèlìmònà mu . . . Meegidònà—Meegidònà.*

Ne mu ditùnga nemwikalè madilu, dîkù ne dîkù dyônsò pabule; dîkù dya nzubu wa Davidi pabule, ne bakàji bààbò pabule; ne dîkù dya nzubu wa Natànà pabule, ne mèkù àbò pabule;

Ne . . . nzubu wa Lewi . . . ne bakàji bààbò ne mèkù àbò pabule; . . . ne Simèònà ne bààbò pabule;

Ne mèkù ônsò àdi mashààle awu, dîkù ne dîkù dyônsò . . . ne bakàji bààbò pabule.

⁸³ Nebàdyũmwè bundu bikolè, pùimanàbo mwaba awu bàmòna ne Mwine uvwabò bapoopèle pa nkùrusè ne bavilè awu, mwimàne mwaba awu, s'ki Yòzefù wabò sungasunga wa mushinga mukole awu. Nekwènzekè madilu manene a menemene! Nenku nebàmbè ne: “Abi bibangu bya mpùtà Udi mubipetèle penyì?”

⁸⁴ KwambaYè ne: “Mu nzubu wa balunda Bàànyì.” Nudi numòna cîndi njinga kwamba anyì? Bwa kujikija mpekaatu, bupidyà, ki cidiYe úvwila ncyoci aci.

⁸⁵ Nenku cidimu cya makumi mwandamutekètè cya Danyèlè eci, lumingu lwà makumi mwandamutekète elu's wè, eyowa, ùlwà bwa kujikija mpekaatu, kuumumusha. Nudi bumvwè mpindyewu anyì? Cya kumpàlà ncinyì? “Kulekeesha dishipa dya mikenji.” “Kujikija mpekaatu.” Nombà mwisâtù: “Kwenza dipungisha bwa bubì.” Nwènú bàdi munkaci mwa kucifùnda abu.

Mvwa ne mikwabo Mifùndù mitwe ku yisambombo mwaba awu, kadi ndi anu nyitùpika, bwalu kùdi luuyà lukolè. Katwèna baswe kwangata dîbà dipitèpite búngì to. Ndi muswe kubifila búngì anu bùndi mwa kufilaku abu, kadi kî nkunùlama ntàntà mupitèpite bule to. Eyo.

⁸⁶ “Kwenza dipungisha bwa bubì.” *Bubì* “nkwenza kwa cilèma,” mwàkenzàbo ku nkùrusè amu. Yèyè wàkenza dipungisha, kadi kadyàkwangaciibwa bwàbò bôbò to. Kadyàkangaciibwa bwàbò bôbò to. Bwa cinyì? Bwalu bàvwa bafomija ne kabàyi mwa kucimòna to. Kadi bààkafomijiibwa bwa cinyì?

Wèwè udi wamba ne: “Ee, pàmwàpà, leelu ewu . . . bwalu mèmè ndi mpofo.” Wèwè udi mpofo nku budiswìle. Bôbò bàvwa mpofo mbwalu Nzambi ngwàkabàfomija. Kadi wèwè udi mpofo bwalu udi mpofo ku budiswìle bwebe. Kakwèna dipungisha bwebe wèwè to. “Nwènú kanùyì nwitabuuja ne Ndi

Yèyè to,” mwàkambà Yesu, “nenùfwe mu mpekaatu wenù.” Aci’s ncyá bushuwa.

⁸⁷ Mpindyewu twàlukilàayi cyàkàbìdì mu Zekàayi, nshapità wa 13. Mpindyewu tùteelejàayi kaaba aka. “Kwenza dipungisha.” Mpindyewu, mwaba wùdì eci...Mvwa nkèba muntu kampànda, àteelejè eci—àteelejè eci, pàmwàpa Mukalenge neàcivwijè mushindu kampànda.

Mu ditùkù adi nekwikalè . . .

⁸⁸ “Mu ditùkù adi.” Docteur Scofield mmutèèke mu méyì èndè a kwinshi kwa dibeji emu, anyì mu mitù ya tusaka twèndè emu ne: “Bàshààdìlè . . . Bàshààdìlè bàvwà ne kanyinganyinga bàakafùnkuna ku nkùrusè.”

⁸⁹ “Bwa kwenza dipungisha bwa bubì.” *Bubì*, “ncintu cyùdì mwenzè mu mushindu mubì, cyùvwà mumanye bìmpè menemene, cìvwà kacìyi cìkèngela bwa wèwè kwikala mwenzè to.” “Mémè mulongòlòle bubì munda mwa mwoyi wànyì, Nzambi kàakuntèèlejilakù to.”

⁹⁰ Mpindyewu, mu Zekàayi nshapita wa 13, tùbàngilàayi ku mvensà wa kumpàla—ku wa kumpàla.

Mu ditùkù adi nekwikalè mpokolo mukàngula mu nzubu wa Davidi ne bwa bàdì basòmbèle mu Yelusàlèrà bwa mpekaatu ne . . . bwa bukooyà.

⁹¹ Nekwikalè nzubu muunzulula. Tùtungunukàayi; tudi bafwànyine anu kucìbala too ne kwinshi. Ndi muswe bwa nùcìfùndaayi bwa nwacìbala. Kadi mpindyewu, mémè ndi mucyènzè kaacimanyinu kaaba aka bwa kubangila ku mvensà mwi6 kadi kubala too ne ku wa 10. Eyo, tùbalààyaaku mpindyewu bwa kumòna, to, kubala too ne ku wa 9’s wè.

Ne muntu neàmukonkè ne, aci nkwèpì . . . Eyi mmpùtà kaayi mu cyanza cyebe aci? Dìbà adi yèyè neàndamunè ne: Yòyi ayi . . . nyìndì mupetè yìvwà . . . (Tùmonèbi.) . . . neàndamunè ne: Nyìdìbò bantàpe mu nzubu wa balunda bàànyì.

Juukà, Éyì mwele wà mvità, ùtapè mulami wa mikooko, ne ùtapè muntu udi mwena dyànyì awu, mùdì MUKALENGÈ wa cilwilu wàmba, tàpa mulami wa mikooko, nenku mikooko neyítangalakè, nenku mémè nènkuDIMWINÈ cyanza cyànyì kùdì bàà bakese abu.

⁹² Mpindyewu, Yesu ngwàkatèèla Mufùndù awu. Mònaayi: “Tàpa Mulami wa mikooko, ne tàngàlàjà mikooko.” Kadi mònaayi kasaka kàdì kàlondà aku. Yèyè wàkakàtèèla anu too ne mwaba awu. Kadi tàngilàayi cìdì cyambilu cyàkù cìdì cìlondà aci cyàmba, citùpà cyàkù cìdì cìlondà aci. “Nenku NènkuDIMWINÈ cyanza Cyànyì kùdì bàà bakese abu.” Cinyì? Kasùmbù kàà Benyàminà kàdì munkacì mwa kujuuka mpindyewu aku. “NènkuDIMWINÈ cyanza Cyànyì kùdì bàà bakese.”

93 “Tàpa Mulami wa mikooko.” Izaleela, dyàmbedi, Izaleela wàkatàpa Mulami wa mikooko, kutangalajayè mikooko too ne pa buloba bujima. Kadi Nzambi mmwambe ne: “Nênkudimunè cyanza Cyànyì, bwa kwangata bânà bakese abu ku ditùkù dya ndekeelu.” Dìbà kaayi? Pìikalà dipungisha bwa bubì dyenjiibwe.

94 Izaleela neàsungidiibwè, yònsò wa kùdìbo. Tùbuululàayi mu Yeshàayi. Yeshàayi, nshapità wa 66 wa Yeshàayi, bwa kubala anu katanci kakese cyanàànà. Nenukù tùmònàayi cidì Nzambi wamba mùdì Izaleela ùsùngidiibwa, ntàntà wìkalaci mwa kwangata bwa kusùngila Izaleela. Tàngilàayi nùmònè mwàlwàcì ne lukasa lwònsò. Mu Yeshàayi, nshapità wa 66 ku mvensà wa 8. Wèwe muswe kucìbala cyònsò, mbìmpè.

*Nganyì ukààdikù muumvwè cintu bu nanku?
nganyì ukààdikù mumòne cintu bu nanku? Buloba
nebwenjiibwè ne kulela...mu ditùkù dimwe...
mu ditùkù dimwe anyì? ..bwalu pàdì anu Sionà
ùdinyènga bwa kulela, yèyè kulela bânà bèndè.*

95 Sionà mmwenzè anu ùmòna ne ùvwa m’Maasiyà wabò, kulediibwayè cyàkàbidì, mu ditùkù dimwe. “Kwenza dipungisha bwa mpekaatu, ne kwenza dipungisha bwa bubì, bukooyà.” Kaa, ekelekele! Bàvwa benzè cìvwà cibì, cìvwà cilèma. Dipungisha dyàkenjiibwa bwa bubì bwàbò.

96 Nombà mwinàyi. “Bwa kubweja bwakànè bwa kashidi.” Aci ki cintu ciinàyi cyàkavwilàYe. Ciinàyi, cyàkavwilàYe bwa kwenza. “Bwa—bwa kubweja bwakànè bwa kashidi.” “Kujikija mpekaatu; dipungisha; ne kubweja bwakànè bwa kashidi.” Pààkajikà dishipa dya mikenji dya Izaleela...Pàvwà dishipa dya mikenji dya Izaleela... .

97 Mpindyewu netwìkalè mwa...Ndi muswe bwa nùbakulè eci, bwalu patwàtwàlà mukàjì awu, ne dragon awu wìpaciibwa, nenwàlukilè cyàkàbidì buludi ku Mufùndù wumwewumwe ewu. Ikàlaayi batwìshìibwe ne nudi baWùfunde. Pààjikà dishipa dya mikenji dya Izaleela, Sàtaanà, yèyè udi mùbàfùndi wabò bôbò ne mutùfùndi wetù twètù, Sàtaanà neàswikiibwè mu bwinà bùdì kabùyi ne cishìikidilu. Dìbà kaayi? Dìbà dya kubweja bwakànè bwa kashidi, cintu kampànda cidì kacìyi mwa kwìkala ne ndekeelu to, cyònsò cìvwà cìtwàlà bubì aci necyùmushiibwè.

98 Twàngatàayi Bwàkabuulwibwà nshapità wa 20 ku mvensà wa 13, katanci kakese cyanàànà, ne tùbalàayi kaaba aka katanci kakese cyanàànà. Bwàkabuulwibwà 20, ku 13... To, mfwilaayikù luse. Bwàkabuulwibwà...1 too ne ku 3, eyowa. Nèvwa mumòne kaacimanyinu kakese munkacì mwàcì aku to. Bisùùlùlù mwab’ewu bìdì bimbwela mu mèsù. Bwàkabuulwibwà nshapità wa 20, nenukù tùmònàayi.

*Nenukù mèmè kumòna mwanjelo ùpweka ùfùmina mu
dyulu, mwìkalè ne nsapì ya ku bwinà bùdì kabùyi ne
cishìikidilu ne munyòolòlò munene mu cyanza.*

...wàkawkàta dragon, nyòka wa kale awu, udi dyabùlù, ne Sàtaanà, ne wàkamuswìka bwa bidimu cinunu,

Ne wàkamukùpa mu bwinà bùdì kabùyì ne cishìikidilu, ne wàkamukàngilamu, ne wàkamutwà citampì, bwa kàyìkù ne cya kuseeswìsha kabidi ditungà to, too ne pàvwà bidimu cinunu ne cya kuula; ne paanyimà pàà cyôci aci... ùvwa ne cya kusùùludiibwa bwa citùpà cìpì.

99 Kwenza... bwa kashidi. “Kubweja bwakànè bwa kashidi,” Sàtaanà mu bwinà bùdì kabùyì ne cishìikidilu. Nenukù pàdìYè wènza aci, ùdi ùtwa dyabùlù citampì yèyè ùvwa useeswìsha bantu awu.

100 Mpindyewu twàlukilàayi mu Habàkùkà, nshapità mwi2. Habàkùkà, nshapità mwi2. Ne mpindyewu netwìkalè mwa kumòna bwa cinyì Wàkaswìka nyòka wa kale ewu, ne bwa cinyì cyôci aci cyàkenjiibwa, ne ncinyì cidì cyènzekà dyàkàmwè paanyima pàà yèyè muswikìibwe. Mémè ndi munange cyôci eci, kadi nwnènù? Cìdi—cìdi cikatùfikisha ku dimanya dya cintu kampànda. Habàkùkà, Habàkùkà, nshapità mwi2 ku mvensà wa 14, ngeela meeji ncyôci, ndi muswe kubala. Pàdì cyôci eci cyènzeka... Tàngilàayi.

Bwalu buloba nebùlè tètè ne dimanya ne butumbi bwa MUKALENGE, anu mùdì màyi àbwikila mbù.

101 *Brrrrr! Ekelekele! Yoyòyò!* Mu ngaakwilù mukwabo, pàdì mwena lukunà ùmana kuumushiibwa, ndekeelu wa mpekaatu wàfiki, dibweja dya bwakànè bwa kashidi dyàfiki, Sàtaanà mmukangila mu bwinà bùdì kabùyì ne cishìikidilu, ne dimanya dya Mukalenge nedìbwikilè buloba anu mùdì màyi àbwikila mbù amu. Amen! Butumbi kùdì Nzambi’s wè! Cìlwalwa, mwaneetu, cìlwalwa! Bakàjì nebiikalè bainàbànza, ne balùme nebiikalè bantu bàà bukàlàngà. Amen!

Pùulà dimanya dya Mukalenge pa buloba ne pa mbù ne mu dyulu;

Nenku, kaa, mwoyi wànyì wùdì wùtwa mikèmu, wùdila bwa ditùkù dya diikisha dya kalolo adi,

Pàalukilà cyàkàbìdì Yesu wetù pa buloba.

102 Amen! Eyo. Mpindyewu, dìbà adi Bukalenge bwa bidimu cinunu bwàbangì. Dìbà adi ki dìikalà Bukalenge bwa bidimu cinunu, dìikalà Cimenga aci ne cya kwibakiibwa. Ciinàyì... Ndi ne mikwabo Mifùndù mitwè ku yisambombo, kadi netùlwìjakajè. Mpindyewu, patwàlukilà, nèngàngatè mikwabo Mifùndù eyi; kadi bìdì binùpèèsha anu cingènyingenyi cyanàànà cya byònsò.

103 Nombà mwitànù. “Bwa kutwà citampì ku cikèènà-kumòna ne cipròfetà.” Nwamònu’s, Mwanjelo awu wàkalwa bwa kutwà citampì ku cikèènà-kumòna ne cipròfetà.

Ndi—ndi ngumvwa bibi bwa kwamba eci. Kadi, mufùndi munene kampànda, ùmvwà mbala bamba ditùkù adi, piikalàbi ne kàvwa mubwejàkàje aci’s! Mmwambe ne “Cìvwàci . . .”

Mpindyewu, anu bwa kuleeja mùdì dikùtàkana . . . Kaa, mfwilaayikù luse. Ncyèna ne meeji a kwamba nanku to. Nùmfwilaayikù luse. Kì ncìndì muswe kwamba to. Ncyà bushuwa ne kì ncìmvwà muswe kwamba to. To. Muntu kàyikù ne—ne—ne dilaabiibwa to, nwamònu’s,

Muntu awu mmwambe ne: “S’nudi numòna kaaba aka ne bikèènà-kumòna ne cipròfetà bivwa byanyishila misangu yònsò anu ekeleeziya wa beena Yudà.” Kì yèyè ne: “Kubangila anu cikondo cya Danyèlè, pààkalwà Danyèlè apu, cìvwa cyùmvwija ne kabàvwa kabidi mwa kupeta cikèènà-kumòna anyì cipròfetà to.” Yèyè ne: “Bintu byònsò bidìbo bamba leelu ewu, bya dimòna dya bikèènà-kumòna ne cipròfetà ebi, byònsò abi bivwà ncintu cya dyabùlù,” ne, “cintu pààci ne mbikèènà-kumòna ne biprofeta kabìvwakù to.”

Mwaneetu, s’kwàkalwa bapròfetà makumi paanyimà pàà Danyèlè. Ne kùvwa Yone Mubàtiji. Kùvwa Yesu Kìlisto. Kùvwa bapròfetà mu Dipungila Dipyaadìpyà dijimà. Kùvwa bikèènà-kumòna. Kùvwa Banjelo.

Nansha twamba mwine mmunyi mùdì muntu wetù ewu mwa kwamba nanku awu? Kadi, nudi numòna’s, aci’s ncyà meeji a budìsu, bwa kuteeta bwa kufinyika cintu mu mitu ya bantu, bwa kucìvwija kaadilongesha kàà ekeleeziya, anyì kaacintu kakese kàà lukutukutu, bwa kushààlakù bulelèlè kùdì bantu. Ne bantu abu bòbò kabàyi ne Nyuma Mwìmpè to, nebàseeswishiiwbè kùdì kaacintu aku.

104 Mpindyewu, katwàngaci cìdì muntu kampànda mwambe to. Mpindyewu, kakwèna Mufùndù bwa kujaadika ciine aci nansha. Pa nanku mmunyi mùndìku mufwànyìne kwangata ciine aci? Ee, tùjandulàayi cìdì bulelèlè ditwà dya citampì. Tàngilàayi! Yèyè wàkalwa bwa kwenza cyòci aci, bwa kutwà citampì ku cikèènà-kumòna ne ku cipròfetà.

105 Mpindyewu, twànjàayi kwalukila buludì ku Mukàndà wà Danyèlè, mutùvwà amu. Mu Mukàndà wà Danyèlè amu, netùpetè anu cìdìYè mwambe. Mpindyewu tùbuululàayi mu Danyèlè nshapità wa 12. Mpindyewu, patùdì tuya mu Danyèlè 12 apa, mpindyewu, tudi mwa kubanga. Nenku tùbalàayi kubangila ku . . . Panwikalà baalùkile kumbèlu, ndi muswe bwa nùbalè kuumukila ku mvensà wa kumpàla kutùngunuka. Tùbalàayi anu kubangila ku mvensà wa kumpàla, kupweka too ne ku mwi4.

Nenku diine dibà adi Mikàèlè neàjuukè...mfumu munene wikala mwa kujuuka bwa bàna bàà cisàmbà cyebe;...

Mpindyewu, eci nku cikondo cya nshìikidilu.

...ne nekwikalè cikondo cya ndululu, cya kacya... ditungà...

Apu mpààpàtukà mufwilakanyi ne Kilisto, mubàndi wa pa kabalù wa Citampì cya Kumpàla ewu, pààbwelàye mu cyalu.

...mene too ne ku cikondo eci;...

Kì mmu cikondo cìvwà Tiitò mukwàte bimanu bya Yèlusàlèmà aci to. Aci cìvwa anu mu mwaba wumwepele cyaanàan. Tangilàayi pàdi mufwilakanyi ne Kilisto ewu, mfumu uvwa ne cya kulwa awu, tàngilàayi pàdiye ùlwa.

...mene too ne pa cikondo cimwecimwe aci, ne mu cikondo aci cisàmbà cyebe necisungidiibwè, yònsò udi usanganyiiibwa mufùnda mu mukàndà awu.

Aleluuyah! “Cisàmbà cyebe,” Izaleela, “neàfundiibwè mu mukàndà.”

Ne bàbùngì bàà kù aba bàdi balààle tulù mu lupwishi lwa buloba nebàbiikè, bàmwè bwa mwoyi wà kashidi, ne bakwabo bwa bundù ne dipeetudiibwa dya kashidi.

¹⁰⁶ Nansha twamba mwine mmunyi mùvwàbi bifwànyine kwikala pàvwà Tiitò mukwàte bimanu bya Yèlusàlèmà? Bìvwa bifwànyine kwikala nanku munyi? Kabìvwakù mwa kwikala nanku to. Nwamònu’s, yèyè ùdi wàkula bwa cikondo cya nshìikidilu, ku dibìikà dya ku lufù. Neyà bushuwa anyi? Mpindyewu:

Nenku aba bàdi ne lungenyi nebàkenkè bu dibàlakana dya dyulu, ne aba bààkùdimunà...aba bààkùdimunà bààbùngì kubàtùma ku bwakàne...bu mitooto bwa kashidi...

Tèèlejàayi! Ditwà dya citampì dya cya bushuwa, dilelèlè, ki dyòdi edi.

Kadi wèwè, Èyi Danyèlè, bwikila mèyi awu, ne twà citampì ku mukàndà awu, too ne ku cikondo cya nshìikidilu;...

¹⁰⁷ Ncinyi aci? Kaa, aleluuyah! Nudi nucimòna anyi, nwènu kàlaasà? Dibuuuludiibwa dya Yesu Kilisto edi, ne dya Bukolè Bwèndè, dya Dilwa Dyèndè, dya cikondo cya nshìikidilu, òvwa ditwibwe citampì too ne ku cikondo eci. Ki cìvwàYe mulwe kwenza ncyòci aci. Ncisokoka bamanyi bàà mabàla; kí mbya bìkèmesha to mùdibo baswè kwangata, “dicìtwà dya citampì,” kale wàwa, bu ne “kàkwèna bapròfetà,” ne bikwabo byònsò mu cikondo cya kale. Kacyàkwikalakù ne pàà kucijaadikila to. Kadi cikèènà-kumòna, cikèènà-kumòna eci, cyàkatwibwa citampì too

ne mpindyewu mene mwab'ewu. Nenku ki pòpò apu pândi mêmè ntèeka dyànyì diitabuuja, bwa ne Nzambi neàbuululè mbingu makumi mwandamutekète ayi. Amen! “Cìtwè citampì,” mwàkambàYe, “too ne ku cikondo cya nshìikidilu. Kànga Mèyì awu ne twà citampì ku Mukàndà awu too ne ku cikondo cya nshìikidilu.”

¹⁰⁸ Cyàkènzàye ncinyì? Kutwà citampì ku cikèènà-kumòna ne ku cipròfetà! Danyèlè nguvwa mwambe cipròfetà bwa bintu ebi. Ûvwa mubimòne mu cikèènà-kumòna, ki Mwanjelo kupweka bwa kutwà citampì ku cikèènà-kumòna aci, ne kutwà citampì ku cipròfetà. Bòbò bàdi mwa kucibala, kadi kabàyi mwa kucyùmvwà to, too ne ku cikondo cya nshìikidilu. Cikondo ya nshìikidilu, cikondo cya nshìikidilu ncinyì? Ndekeelu wa lumingu lwà makumi mwandamutekète, pìkala mfumu awu, mufwilakanyi ne Kilisto awu, pàabuuludiiwàye, mu cikondo eci, ùdivwija yèyè mwine Nzambi. Mmunyì mutùdi tumanya ne cyôci eci nciwà citampì too ne ku cikondo eci? Danyèlè wáfumu ku dijikija; ewu nnshapità wa ndekeelu wa Danyèlè.

¹⁰⁹ Mwaneetu wa bakàjì Simpson mmungambèle mu mapingaja emu, wàmba ne: “Mwaneetu Branham, mèmè ndi mubale Mukàndà mujimà wà Danyèlè. Nciwvakù—nciwvakù ne cimvwà mumanye pàngààjikijì, cipite pâmvwà mubangè apu to.” S'ki cyôci eci, Mwaneetu wa bakàjì Simpson, pawikalà kaaba aka dilòlò edi. Ngeela meeji ne ndi mumumòne musòmbe mwaba wàwa. Ncyàkambakù bwalu nansha bumwe mu ditempu dya màshinyì amu to. Mvwa anu mupùwe, bwalu mvwa mwele meeji ne pàmwàpa nêmfikèku.

Kadi, cikèènà-kumòna ciwà Danyèlè mumòne, kumpengà kwa musulu kwàka aci, cyàkatwibwa citampì, “too ne ku cikondo cya nshìikidilu.” Cidi...Ngånjì anu kucibala kaaba aka. Nwamònu anyì?

Kadi wèwè, Éyì Danyèlè, bwikilà mèyì awu, ne twà citampì ku mukàndà awu, too ne ku cikondo cya nshìikidilu; bààbúngì nebànyeemakanè bààtwa eku bààtwa eku, ne dimanya nedivulanganè.

Nenku mèmè Danyèlè ngákatàngila, ne, mònaayi, kúwa kwimàne...babidi,...umwe ku luseke lumwe...lwà musùlù, ne mukwabo ku mukwabo mwelelu wà musùlù.

Nenku umwe wàkambila muntu uvwa muvwàle bilàmbà bya—bya linà, uvwa pa màyì a musùlù awu ne: Nebinengè ntántà bule kaayi too ne kundekeelu kwa maalu a kukèma aa?

Tèelejààyaaku mpindyewu.

Ki mèmè kuumvwa muntu uvwa muvwàle bilàmbà bya linà, uvwa pa màyì a musùlù awu, pàakabàndishàye cyanza cyèndè cya dyàbalume ne cyanza cyèndè cya

dyàbakàjì muulu bitàngija mu dyulu, ne kudicìpayè kùdi ewu udi ne mwoyi bwa kashidi ne kashidi awu ne nebùikalè bwa cikondo, cikondo, ne cyàbibìdì cimwe cya cikondo; . . .

Mpindyewu, nyewu tumùfika anu—anu menemene ne: “Cikondo, cikondo, ne cyàbibìdì cimwe cya cikondo.” Mpindyewu nùtangilàayi patwàbwelà mu mbingu makumi mwandamutekètè ya Danyèlè, mùdì cyôci aci cidizòla. Ki pààbuuludiibwà bwalu-busokoka abu. Eyo. “Cikondo, cikondo, ne cyàbibìdì cimwe cya cikondo.”

. . . ne pùikalàye . . . (“yèyè,” mupinganyi muleeji muntu mpindyewu, mufwilakanyi ne Kilisto awu) . . . mukùmbaj- . . . mukùmbàje mukùmbàje bwa kutangalaja bukolè bwa cisàmbà cya cijila, (ki pààshipàye cipungidi cyèndè munkaci mwa lumingu mpòpò apu), bintu byònsò ebi nebùikalè byùle. (Amen.)

Nenku ngàkatèèleja, kadi ncyàkuumvwa to: pashùshe ngàkamba ne: Éyì . . . Mukalenge, ndekeelu wa bintu ebi neikalè cinyi?

Nenku yèyè wàkamba ne: Ndàaku kwebe kùyaayà, Danyèlè, bwalu mèyi aa mmakànga ne matwà citampi too ne ku cikondo cya . . . [Disangisha dîdi dyàmbe ne: “Nshùkidilu.”—Muf.]

Kaa, kanùpukù aci mwoyi to!

too ne ku cikondo cya nshùkidilu.

Bààbùngì nebàkezudiibwè, ne nebàtòokeshiibwè, ne nebàteeciibwè; kadi beena lwonji nebènzè maalu ne lwonji, ne nansha umwe wa ku beena lwonji kààkuumvwa nansha; kadi bàdi ne meeji nebùmrvwè.

¹¹⁰ Mukenji wa cikondo cya nshùkidilu ngwàcibuululà; cikondo cya ndekeelu cya ekeleeziya. Butùmbi’s wè! Yoyóyò! Ki bwalu mbwòbù abu’s! Kaa, ekelekele! Cìdi cìntútula, pàndì ngeelakù meeji, bwalu-busokoka abu! Bintu bìdì bantu bàà bukwàèkèleeziyà bàbwitapù kwìsù, bàmba ne: “Mbya macimbu” abi. Bwalu-busokoka bwa ne Yesu Kilisto ùvwa Nganyì; kàyi Mupersona mwisàtu, kàyi Mupersona mwibìdì, kàyi Mupersona mwisàtù to, kadi Mupersona awu wa Nzambi. Maalu-masokoka makwabo ónsò a Nzambi aa neàbuludiibwè, bwalu mbifundiibwe kaaba aka mu Mukàndà ewu, ne nebàbìbuulwilè lukòngò lwà cikondo cya nshùkidilu. Kabèèna mwa kubimòna mu maasèminèrè, ne mu bilongelu, ne mu màngumba to, anu mùdì beena Yudà kabàyi bafwànyine kumòna ne Yesu ùdi Maasiyà to. Kabyèna bikèmesha to pàdìbo bàteeta kwela meeji ne nwènù nudi bapàle. Kabyèna bikèmesha to pàdìbo bèèla meeji ne nudi bakùtākàne. Kabyèna bikèmesha to pàdìbo kabàyi mwa kuumvwa bwa cinyi nwènù kanwèna nwenza cyokò-cyokò pàmwè naabo to. Mbwalu, kùdi

Bukolè ne cikèènà-kumòna byènda bìcilonda, Dìyì dya Nzambi didì dibuulùdìibwe, bwa kutèèka Ekeleeziya mu bulongàme bwa Dyambwibwa ne diya dya Kumbèlu. Eyowa. “Bààbùngì nebànyeemakanè bàkatwà eku bàkatwà eku, ne dimanya nedivulanganè.” Cya bushuwa.

111 Mpindyewu, cikwabo cintu cìdì cifwànyine kumanyika ncinyi? Tàngilàayi maèkèleeziyà leelu ewu,. S’ncyôci eci. Ndi ntèkemenà ne kacyèna citàpa ku mwoyi to, kadi bikèngela ncyàmbè. Kwenza . . .

112 Mu ditùkù adi nekùjuukè mufwilakanyi ne Kilisto.

113 Mpindyewu, vùlukàayi ne, patwàbwelà mu Bitampì, mufwilakanyi ne Kilisto awu ùdì ùpàtuka buludì mubànde pa kabalù mu Bitampì abi. Danyèlè mmucyàmbè kaaba aka ne: “Mfumu uvwa mwa kulwa awu.” Ùvwa mwa kukòshiihwa, Yesu, bwa kwenza dipungisha bwa cisàmbà. Kadi: “Mfumu ùvwa mwa kajuuka, uvwa mwa kajuula cinyangu bwa kufila kabùtù awu,” ùvwa n’Loomò, ku Tiiò. Kadi ewu musangu, mfumu wapàtukila mu Loomò, ngwacyèna. Ne yèyè neàbuuludìibwè ku ditùkù dya ndekeelu, tèelejàayi mpindyewu, “ùdivwija yèyè mwine Nzambi,” mùdì Nyuma Mwìmpè ùtùdimwija mu Teesàlònìkà Mwibìdì, mwi2.

Twànjàayi anu kuyakù, Teesàlònìkà Mwibìdì, nenku dîbà adi kabyàkukèngela bwa nwènu kwangata dîyì dyànyì mèmè to kadi Dìyì dya Nzambi. Teesàlònìkà Mwibìdì, nshapità mwi2 ku mvensà wa 12. Tùmonebi. Teesàlònìkà Mwibìdì, nshapità mwi2 ku mvensà wa 12. Tùmonebi. Tùbangilàayi lwà kumutù kwa cyôci aci aku, ku mvensà wà 7.

Bwalu bwalu-busokoka bwa bubì bùkaadi bùkwàta mudimu; . . .

(Udi wakula ewu m’Pòlò, ku Nyuma Mwìmpè). . .

kadi—kadi yèyè udi ukànda mpindyewu awu àlekelè, too ne pùumushiibwàye mu njila.

“Yèyè” awu nganyì kaaba aka? Kùdikù muntu udi mumanye anyi? Nyuma Mwìmpè: “Yèyè udi ukànda” awu.

Nenku pashìshe (dîbà) dyàbuuludìibà Mwena lwonji awu, . . .

Dîbà kaayi adi? Anu dîbà dîikalà Nyuma Mwìmpè mwa kuumushiibwà adi, udi pawîpì ne kuumuka mpindyewu mene awu. Cìdì Ye ùmukila ncinyi? Ùdì wàngata Ekeleeziya ùya Nendè. “Mubuulùdìibwe!” Pòlò ngudi wakula, ku disonsodiibwa.

. . . wìkala Mukalenge mwa kwosha ne nyuma wa mukana mwèndè, ne wabùtulayè ku dibàlakana dya dilwa dyèndè; (mwena lwonji awu’s, mu bushuwa bwa bwalu)

*Yéyè mene, mwena dilwa didi bilondëshile bwenzeji
bwa Sàtaanà pàmwè ne bukolè bwónsò ne bimanyinu ne
maalu a kukèma a mashimi,*

“Twètù ki bàdì ekeleeziya wa mutàmbe bunene. Twètù ki bàdì ne *bikampànda*. Twètù ki bàdì ne *bikampànda*. Dyènzàayi bônso cimùkù,” nwamònu’s. “Twètù ki bàdì batàmbe bunene.” Maalu a kukèma a mashimi!

*Pàmwè ne byónsò . . . bya bubì mu aba bàdì bàbùtuka,
bwalu kî mbaakidile dinanga dya bulelèla to, bwa
bààmòna mwa kusungidiibwa.*

*Ne bwa bwalu ebu Nzambi mmubàtùmìne
miitabuuja makole a mafi, bwa kwitabuujabò mashimi
kwitabuujabò mashimi,*

*Ne bwa bôbò . . . bàdì kabàyi biitabùuje bulelèla
bàpiishiibwè, kadi biikàle ne bisànkansanka mu bubì.*

¹¹⁴ Nudi bacyùmfvè anyi? Kaa, ekelekele! Mpindyewu, Pòlò ngudi wakula ewu. Cikondo cidi Citampì cya Nzambi munkaci mwa kumanyishiibwa, Nyuma Wendè, Dìna Dyèndè, ngàsà Wendè, maalu masokoka makwabo ónsò àdì munkaci mwa kupàtuka mpindyewu aa, ndongamu eyi bwa Ekeleeziya Wendè bwa kuya mu Dyambwibwa; diicikijiibwa dya Nyuma Mwímpè ndìdì dyenzè cyòci eci. Ki cidiYe mwenze mu matùkù a ndekeelu.

¹¹⁵ Mpindyewu, tùmònàayibì. Tudikù ne dìbà bwa cya ndekeelu eci anyi? [Disangisha didi dyàmbe ne: “Amen.”—Muf.] Ciisambombo: “Kwela maanyi pa Mutàmbe kutumbuka.” Kaa, ekelekele! Ki cyòci eci! Cintu cya ndekeelu cidiYe ne cya kwenza, nkwenza cinyi? Mpindyewu, twànjàayi kwalukila mu Danyèlè, tùjandulè byónsò bìdìYe ne cya kwenza mwab’ewu mene. “Mbingu makumi mwandamutekète.” Ncinyi cidi ne bwa kukumbajiiibwa mu cyòci cikondo eci? Eyo.

*. . . mmikòsela cisàmbà cyebe ne . . . cimenga cyebe cya
cijila, bwa kulekeesha dishipa dya mikenji (dishipa dya
mikenji dya cisàmbà), . . . bwa kujikija mpekaatu (bwa
cisàmbà), ne bwa kwenza dipungisha bwa bubì bwabo.
ne kubweja bwakànè bwa kashidì (bwa beena Yudà), ne
kutwà citampì ku cikèènà-kumòna ne ciprófetà (too ne
ku cikondo cya nshìkidilu), ne kwela Mutàmbe cijila
maanyi.*

Ki twipàcilà tusambombo twa dilwa Dyèndè ntwòtò atu.

¹¹⁶ Mpindyewu, “kwela Mutàmbe cijila maanyi.” Mpindyewu, eci cidi mwa kwikala cya pabwàci ndambu bwa katanci kakese cyanàànà, bwa bààbùngì bàà kunùdì nwènù balongeshi, kadi mpindyewu cilamàayi anu bwa katanci kakese cyanàànà, nùmònàayi anu mùdici cipàtuka.

¹¹⁷ Eci ndyela dya maanyi, kadiyi dya muntu to. Yesu ùkaadi mumana kwela maanyi. Mmwòmò anyi? Mukàndà wà Byenzi

mmwambe ne Nzambi wàkeela Yesu maanyi a Nyuma Mwimpè; Wákaya myaba yònsò wènda wènza maalu mimpè, ne wòndopa babèèdi, ne bikwabo. Yesu mmumana kwela maanyi, kujikè. Yèyè ùdi Maasiyà. Ne *Maasiyà* mbwena kwamba ne “Mwela maanyi.” Ncya bushuwa anyi? Kadi ku cikondo cya nshikidilu eci, Yèyè ùdi ne cya kwela Mutàmbe cijila maanyi.

118 “Mutàmbe cijila” ncinyi? Ku wànyi pàanyi mushindu wà dicimòna, wùndi ngeela meeji ne ndi mwa kucijaadika ku Mifùndù, nkwela “Mutàmbe cijila” maanyi, wikalà Ntentà wikalà mwa kukwàciibwa nendè mudimu mu Bukalenge bwa bidimu cinunu. Mpindyewu tèelejàayi, mònaayi bwa cinyi ndi ncyàngata. Cyumvwija mu—mu Yèheezèkèlè, mu nshapità mwi4, cidi. . . To, ndi muswe kwamba nshapità wa 43, mvnsà wa kumpàla ne mwi6. Twàlukilàyaaku mu Yèheezèkèlè bwa tujandulè mùdiye ùcileeja mu cimfwànyi mu Bukalenge bwa bidimu cinunu, mwèlabo maanyi pa. . . Yèheezèkèlè 43, nenku tùbalàayi anu ndambu cyanààna kaaba aka mpindyewu bwa tùmònè ciikalàYe mwa kwenza mu Bukalenge bwa bidimu cinunu, dyela dya maanyi. Mu Yèheezèkèlè 43, eyo, nenku mpindyewu túbangàayi ne mvnsà wa kumpàla, too ne ku mwi6. Nudi mwa kubalàayi cintu cyònsò mu kaabujimà paanyimà pàa bamanè kwalukila kumbèlu, mu bushuwa bwa bwalu, nwènù bàdi bàfùnda abu, Yèheezèkèlè 43. “Paanyimà. . .”

119 Mpindyewu, tàngilàayi, dyumvwija dya mushindu wà Ntempelu wikalà ne cya kwibakiibwa mu Bukalenge bwa bidimu cinunu. Mpindyewu, muntu kanà yonsò, mubadi kanà yònsò udi mumanye ewu, ne kuumukila ku Yèheezèkèlè nshapità wa 40, too ne ku nshapità wa 44, kî ncìngà cintu to ng’anu Ntempelu wa mu Bukalenge bwa bidimu cinunu udi wibakiibwa pa buloba, (muntu kanà yònsò mmumanye aci, nwamonu’s), pàamuujà butumbi bwa Mukalenge, ne bikwabo byònsò mushindu awu. Mpindyewu tudi. . . netwikalè anu mwa kuumvwija mushindu wà Ntempelu awu mu nshapità wa 43, ku mvnsà wa kumpàla too ne ku mwi6.

Paanyimà yèyè kuya naanyi ku ciibi cya cimenga, ciibi mene ciwà citàngile ku esètè.

Nenku, mònaayi, butumbi bwa. . . Nzambi wa Izaleela bwàkalwa búfùmina ku njila wa ku esètè, ne díyi díwva dífwànàngàne ne díyi dya máyi àbùngi, ne buloba bwàkakenkeshiibwa ne bukènkè abu.

Ne bìwva bilondèshile mmwènekèlu wa cikèènà-kumòna cimvwà mumòne aci, bilondèshile cikèènà-kumòna cimvwà mumòne pàngàkalwà bwa kubùtula cimenga aci aci; ne cikèènà-kumòna aci ciwva ciwànàngàne ne cikèènà-kumòna cimvwà mumòne lwà ku musùlù wà Kebààlà aci, nenku mèmè kupòna mutwè mpàla panshi.

Nenku butùmbi bwa MUKALENGE—butùmbi bwa MUKALENGE bwàkabwelela mu nzùbu lwà ku njila wa ku ciibi civwà citàngile lwà ku esètè aci.

Pa nanku nyuma wàkantùntumuna, ne wàkambweja mu bulà bwa munda, nenku, mōnaayi, butùmbi bwa MUKALENGE bwàkuuja nzùbu awu tètè.

Nenku mēmè kumuuvwa wàkula naanyi pambèlù pàà nzùbu, ne muntu awu mwimàne ku luseke lwànyì.

¹²⁰ Dyela dya maanyi, dyela dya maanyi dya Ntempelu awu bwa dikòokesha dya mu Bukalenge bwa bidimu cinunu. Mpindyewu monaayi mu Lewitiki. Mpindyewu tàngilàayi numòne mwàkajidiibwàye mu Lewitiki. Mpindyewu, twètù baalùkile mu Lewitiki, tudi tusangana ne Mòsà ngwàkeela ntempelu awu maanyi. Twànjàayi anu kukwàlukila patùcidiku apa. Tudi ne dībà búngì bukumbàne bwa kucyenza. Nenku twàlukilàayi mu Lewitiki bwa tujandulè pààkeelà Mòsà ntempelu awu maanyi apu, mu Lewitiki nshapità wa 8.

¹²¹ Kaa, mēmè ntu anu munange kupàlakaja Mifùndù ne Mifùndù. Nwènù kanwènakù bacinangè anyi? Nenku pashishe nudi—nudi nupetakù anu ci—ci—cingenyinyeni cya citùdì—cya citùdì munkaci mwa kukèba ne citùdì munkaci mwa kwenza. Mpindyewu, yònsò wa kunùdì mmufikè ku dyumvwa ne tudi tukwàta mudimu ne Mufùndù kampànda ku musangu ne ku musangu, pa bwalu abu.

¹²² Mpindyewu, nshapità wa 8 wa Lewitiki, ne mēmè ndi mufunde kaaba aka, mvensà wa 10. Fùndaayi Lewitiki 8.10. Tùmonàayibi.

Nenku Mòsà wàkangata maanyi a dilaabiibwa, ne wàkapòngolola maanyi a dilaabiibwa, ne wàkeela ntentà wa kusambakeena maanyi ne byònsò bivwamu, ne wàkabijidila.

Nenku...wàkaàmyamina pa cyoshelu misangu mwandamutekète, ...wàkeela cyoshelu maanyi ne mpànza yònsò ayi, ne cyowelu ne dikàsà dyàci, bwa ne...bwa kubijidila.

Nenku yèyè wàkapòngolola...maanyi a dilaabiibwa pa mutu wà Aalònà, ne wàkamwela maanyi, bwa kumujidila.

¹²³ Mòsà, mu cipeèlà, ùjidila, anyi wèla ntentà wa kusambakeena wa dikuukwila awu maanyi, bwa bânà bàà Izaleela pàvwàbo mu lwendu apu. Wàkeediibwa maanyi.

¹²⁴ Mpindyewu, mu Kulondolola Mwibìdì, buulùlaayi, nenku netùmonè dijidila dībà dyàkangatà Nyuma Mwimpè cisòmbedi Cyèndè mu ntentà wa kusambakeena, kadi nùtangilè nùmonè cidi cyenzèke mpindyewu. Mu Kulondolola Mwibìdì nshapità

mwi5, túbangilàayi ku mvensà wa 13. Kulondolola Mwibidi nshapità mwi5, kubangila ku mvensà wa 13.

Nenku *kwenzekabi...ne, pàvwà mpungi ne bimbi bàà misambu...bwa kwenza bwa díyì dimwe kuumvwikadi... ditumbisha ne disàkidila dya MUKALENGE, ne pààkabàndishàbo mèyì àbò ne mpungi ne byamù bya dikùmakaja ne byombelu bya mijiki, ne bàtumbisha MUKALENGE, ne bimba ne: Bwalu yéyè ùdi mwìmpè, ne luse lwèndè lùdi lùshààla kashidi, kwenzekabi díbà adi ne nzùbu wàkuula tètè ne ditutu, ne nzùbu wa MUKALENGE mene,*

Mu mushindu wà ne baakwidi bààkiimana... baakwidi kabàvwa mwa kupeta mushindu wà kukwàta mudimu to bwa ditutu adi, bwalu butùmbi bwa MUKALENGE bwàkuuja nzùbu wa Nzambi tètè.

¹²⁵ Nzambi wàkabwela mu mwaba wà cijila wùvwà ne cya kwediibwa maanyì awu awu, ne wàkafidiibwa kùdiYe bwa bantu kwikalabò bàlwa bwa kukuukwila. Pa nanku, bwa kwela maanyì, kaciyi mwaba “wèbè wà cijila” to, kadi bwa kwela mwaba “Mutàmbe cijila” maanyì. Nenku tudi tumòna, ne, Yelusàlèmà Mupyamùpyà ki mwaba “Mutàmbe cijila.” Nenku dyela dya maanyì nedìikalè pa Yelusàlèmà Mupyamùpyà udi utùluka ùfuma kùdi Nzambi mu Dyulu, mulongolola mùdi mukàjì-musela mulengejila bàyèndè. Dyela dya maanyì nedìikalè pambidi pààbò.

¹²⁶ Mpindyewu, pààkajidilà Zolòbàbèlè wèndè ntempelu awu, paanyimà pàà yéyè mumanè kwibakiibwa cyàkàbìdì, kààkeediibwa cyàkàbìdì maanyì to, bwalu ùkaavwa mumana kwela maanyì; ne wàkuupudiibwa, ne wàkiibakiibwa anu cyàkàbìdì cyanààna. Dibùtudiibwa ndyàkamukwàtà. Ùkaavwa mwibàkiibwe cyàkàbìdì ne mujuudiibwe, nenku kakùcivwa kabidi dimwela dya maanyì to. Pààkeediibwàye maanyì musangu wumwe awu, aci cyàkatungunuka, ne cidi citungunuka too ne musangu ewu mene. Kadi pààjaadikà Nzambi Ntèntà wa mu Bukalenge bwa bidimu cinunu, Yéyè neélè Mutàmbe cijila maanyì; kaciyi “wèbè wà cijila” to, kadi “Mutàmbe cijila.”

¹²⁷ Kadi pàngatà Mfumu Nkwasa Wèndè wa butùmbi bwa bidimu cinunu, (Butùmbi's wè!) kwajiki bwèndè yéyè mpindyewu. Dyela dya Mutàmbe cijila maanyì ki ciikalà cintu cya ndekeelu cyènzekà. Pààshiibwà Ntèntà awu; dibùkà dya ku lufù dyenzèke; beena Yudà baalùkile; Kilisto ne Mukaj'Èndè-musèla balwè; beena Yudà, binunu lukàmà ne makumi anaayi ne binaayi batwibwe citampì; Bukalenge bwa bidimu cinunu bukùmbàne. Nekwènzekè dyediibwa dya maanyì pèediibwà Mutàmbe cijila maanyì; mwaba wà cijila, Mutàmbe cijila wa bàà cijila, ne Mutàmbe cijila. Pàdibi ne, mwaba Mutàmbe cijila ki ntempelu wuwwa Nzambi musòmbèlè, pankaci pàà Bakèlùbà.

Nenku, ewu musangu, Kilisto neàsombelè mu mwaba Mutàmbe cijila, ne dilaabibwa pambidi Pèndè. Ne bôbò kabààkwikala ne dijinga ne dîbà dya muulu muntwamu to, bwalu Mwânà wa mukooko munkaci mwa Cimenga ngwíkala Bukênkè abu. Dîbà kadyadyakubwelakù mu cyôci Cimenga aci to, mùvwà Oncle Jim wa kale ne ciibidilu cya kwamba. Ne kadyadyakubwelakù to, bwalu Kilisto ngwíkala Bukênkè abu, Mwela maanyi awu. Ne Mfumu neâlwe kwangata Nkwasa Wendè wa butumbi munda mwa bidimu cinunu, bwa kukòokeshu.

¹²⁸ Yelèmiyà 3.12-18, mukumbajila ku mikwabo ayi, tùmubalàayi. Mu Yelèmiyà nshapità wa 18 amu, ngeela meeji. Eyowa. To, nshapità wa 12, nùmfwilaayikù luse, nshapità wa 12 wa Yelèmiyà, nenku túbangilàayi ku—ku... Yelèmiyà 3, mfwilaayikù luse. Yelèmiyà 3, ndi—ndi mumufunde kaaba aka, mwaba wùvwà ne, pâmvwà munkaci mwa kulonga, Nyuma Mwîmpè mwikàle anu ùnsàka eku ne eku, mêmè kufunda anu byôbi ebi ne mwanyi mwònsò. Yelèmiyà 3, ne pashiishe 12 too ne ku 18, mukumbajila ku mikwabo ayi. Tùmubalàayi.

Ndà ùkòbolè mèyi aa lwà ku nord, wamba ne: Alùkilà, wèwè Izaleela udi mutwè cimpingà awu, mùdi MUKALENGE wàmba; nenku ncyàkwenza ne ciiji cyanyi—cyanyi... kwenza ne ciiji cyanyi cikupònènè to, bwalu ndi ne luse, mùdi MUKALENGE wàmba, ne ncyàkulamakù ciiji kashidi nansha.

Cibi itàbà bubì bwebwe, bwa ne udi mushipè mikenji kumpalà kwa MUKALENGE Nzambi webè, ne mutangalajile mwenyi njila yebe mwinshi mwa mucu mubishi wònsò,...

Ki cidibo benzè ncyôci aci, kuumukila ku esètè, wesètè, ditungà ne ditungà dyònsò. Nwamònu anyi?

...ne kanwèna batùmikile diyì to, diyì dyanyi, mùdi MUKALENGE wàmba.

“Kùdimukàayi!” Tèelejàayaaku eci.

Kùdimukàayi, Éyi bânà bajimìne, mùdi MUKALENGE wàmba, bwalu ndi (m-u-n-ù-s-è-l- -e)... ndi munùsèle;...

“Mèsù àbò àvwa mafofomija, bwalu Ndi mupèeshe bàà Bisàmbà bya bendè mpungà. Kadi, alùkilàayi, bwalu Ndi munùsèle.”

...nenku nènnwängatè umwe mu cimenga, ne babidi mu dikù,...

Ki mbònsò bàdi bàdibìikilà ne mbeena Yudà abu bààbwelà to. Kadi kasumbù kasungula aku nkààbwelà, Beenyàminà mwànà udi ujuukamù kumpalà kwa Yòzefù awu, kasumbù kàà bàdi bàfùminà mu ditungà ne ditungà dyònsò, umwe mu cimenga ne cimenga cyònsò, ne mu dikù ne dikù dyònsò aku.

. . . *ne mêmè nêndwe neenu mu Siònà.*

Ne nênnùpèèshè mpaasàtà wa pa mwoyi wèbè, wanùdiisha dimanya ne dyumvwa.

Ne nebyênzekè ne, panwàlwà bààbúngi ne bavùlàngàne mu buloba ebu, mu miine matuku awu, mùdi MUKALENGE wàmba, kabààkwamba kabidi ne: Mu—mushèètè wà cipungidi wà MUKALENGE to; anyi kacýàkulwa nansha mu meeji to; anyi kabààkucivùluka to; anyi kabàà—kabààkucyèndelakù. anyi kacýàkwenjiibwakù kabidi to.

Mu cikondo aci nebàbiikilè Yelusàlèmà ne nnkwasa wa butùmbi wa MUKALENGE, (bwalu Yèyè neikalèmu, nwamònu's), nenku ditùngà dijimà nedikungwilè (aleluuyah) kùdiye, ne dìnà dya MUKALENGE, kùdi Yelusàlèmà; anyi kabààkwenda kabidi bilondèshile meeji àbò bóbò biine mu bubu bwa myoyi yabo nansha.

¹²⁹ Apu mpèèdiibwà Cimenga aci maanyi. Apu mpèèdiibwà Yelusàlèmà Mupyamùpyà awu maanyi. Ne matùngà ónsò a Cimenga. . . Mu Bwàkabuulwibwà nshapità wa 22, mbambè ne biibi kabyàkukàngiibwa bufùku to, bwalu kamwàkwikala bufùku to. Ne bamfumu bónsò bàà pa buloba nebàlwe ne luumu lwàbò ne butùmbi mu Cimenga eci. Bimanu byàci nebiikalè bya mabwe a yaspà ne sardoine, mabwe mishindu dikumi ne yibidi; ne biibi dikumi ne bibidi nebiikalè bya dibwe dya busàngà dimwepele dyangàtàngàne, dimwe ku ciibi ne ku ciibi cyónsò. Kamwàkwikala dijinga dya kàndeyi to. Kamwàkwikala kabidi muunya to, bwalu Mwànà wa mukooko udi munkaki mwa Cimenga awu ki wíkala Bukènkè. Ne Yèyè neàlombolè bantu Bèndè ku Mwoyi wà kashidi. Nemwìkalè micì yibidi miimàne, wumwe ku luseke ne ku luseke lwà musùlù, ne yòyi yidi bwa dyondopiibwa dya ditùnga. Ki Mwela maanyi wàlwa awu, Cimenga cya Cijila cidì cipweka cifùmina mu Dyulu kùdi Nzambi, cìlwa pa buloba.

¹³⁰ Twàngatàayi mpindyewu cyènzekà munda mwa ciine cikondo aci. Kaa, nudi bacinangè anyi? Tùbuululàayi mu Yeshàayi 65, katanci kakese cyanàànà. Mbitàmbe bwimpè bya kabiyi kutùpika. Mbitàmbe bwimpè bya kabiyi kulekela. Nkufwànyine kwikala luuya lukolè ndambu, kadi twánjàayi anu kutùngunuka.

¹³¹ Yeshàayi 65, tèèlejàayi cyènzekà munda mwa ciine cikondo aci. Anji anu kudikonkàkù, mulunda wanyi ngènzàmpèkàatù, ní udikù—ní udikù mwa kwitaba bwa kupangila eci. Yeshàayi 65, tubàngilàayi lwà ku mvensà wa 17. Tèèlejàayi, bantu bónsò, ne ntèmà mpindyewu. Emu mmu cikondo cya Bukalenge bwa bidimu cinunu amu, pàdi Mutàmbe cijila wèdiibwa maanyi.

Bwalu, mōnaayi, nēm̄fukè maulu mapyamàpyà ne... buloba bupyabūpyà, ne bya kale abi kabyàkuvulukūibwa kabidi, anyi kuvwilangana mu meeji to.

Kadi ikàlaayi... ne disànka ne cyònkōmōkàayi... mene bwa bīndi mfūka abi, bwalu, mōnaayi, ndi mfūka Yēlusālēmà... ndi mfūka Yēlusālēmà, (ki Yēlusālēmà Mupyāmūpyà nyawu), disànka, ne cisàmbà cyèndè disànka.

Dyela dya maanyi ncinyi? Disànka dya Mukalenge.

...mfūka Yēlusālēmà disànka, ne cisàmbà cyèndè disànka. Ne mēmè nēncyonkomokelè mu Yēlusālēmà,...

Mfumu mu Nkwasa wa butūmbi, pa ngiikādilū wa ùkēmēsha wa Nkwasa wa butūmbi, Nkwasa wa butūmbi wa Cyendeleele, ne cisàmbà cya Cyendeleele ciikāle ne disànka dya Cyendeleele mu Cimenga cya Cyendeleele! Kaa, ekelekele!

Ne mēmè nēncyonkomokelè mu Yēlusālēmà, ne disànka mu cisàmbà cyānyī; ne dīyī dya mwadi kadyākūmwīkākū kabidi munkaci mwèndè to, anyi dīyī dya mbilā.

Kamwàkwikalakū kabidi...mwānā wa matūkū, anyi muntu mukolè udi kāyī mūje matūkū èndè to; bwalu mwānā neāfwe ne bidimu lukāmā, kadi ngēnzāmpēkātū mwīkālē ne bidimu lukāmā neēdīibwè mulawu.

Ne bōbō nebīibakè nzūbu, ne nebāsombelēmu;... nebākunè mvinyō, ne bōbō nebādye tumuma twāyī.

Kabāākwibaka, bwa mukwabo kusōmbelayēmu nansha; (mbwena kwamba ne, wēwè ufwa ne mwaneebe wa balūme wāngata kaaba keebe) ...kabāākwibaka, bwa mukwabo muntu kusōmbelayēmu nansha; kabāākukūna, bwa mukwabo kudyāye bya pa madimi abi nansha; bwalu anu mūdī matūkū a mucī amu ki mwīkalā matūkū a bantu bāānyī, ne basungula bāānyī nebāsankilè ntāntā mule midimu ya byanza byabo.

Kabāākukwātā mudimu mukolè bwa pātupū nansha, anyi bāpōōla bwa lutātu; bwalu bōbō bādi dimiinu dya mubēnesha wa MUKALENGĒ, ne bāābō bānā ne bōbō.

Ne nebyēnzekè ne, ...kumpālā kwa kubīikilabō, mēmè nēngādamunè, ... (Dyediibwa dya maanyi dya butūmbi adi, paanyimā pāā Mukēlūbā!) ...Mēmè nēngādamunè; ne pīikalābō bācīdi bāākula apu, mēmè nēngūmwè.

Mbwa wa diitu ne mwānā wa mukooko nebidīilè pāmwè, ...nyama wa ntambwe neādye bisoosā anu mūdīadyā cimpāngā cya ngombe amu; bwa lupwishi

kaayi ki lwikalà cyàkudyà cya nyòka. Nenu byòbi kabyàakwenzelangana bibi anyi kubutulangana pa mukuna wànyì wònsò wà cijila nansha, mùdì MUKALENGE wàmba. (Udikù mwa kucipangila anyi? To!)

132 Anji alùkilaayi paanyimà apa cyàkàbìdì, Yeshàayi wàkula cyàkàbìdì, mu nshapità wa 11, mvensà wa kumpàla too ne ku wa 9. Tèelejàayi cidìye wàmba kabidi kaaba aka, pàdiye ùpetà cikèènà-kumòna, paanyimà pàà mumanè kumòna bakàjì abu, mushindu wikalàbo bènza maalù mu matùkù a ndekeelu. Ni-... Ee, Yeshàayi 11, ku 1.

Ne nekùpatukè dikombo ku kaamucì kàà Isàayi, . . . Ditàmbà diikalà mwa kutòlokela ku miji yèndè; (Uvwa nganyi awu? Kilisto). . . ku miji yèndè.

Ne Nyuma wa Mukalenge neàsombelè pambidi pèndè, nyuma wa lungènyi, wa lumvu, nyuma wa mubelu. . .bukolè, nyuma wa dimanya ne. . .dicìinà dya MUKALENGE.

Ne neàmuvwijè wa lumvu lwà lukasa mu dicìinà dya MUKALENGE, ne yéyè kààkulumbulwishila ku bìdiye ùmòna ne mèsù èndè nansha, anyi. . .ku bìdiye ùmvwa ne macì èndè.

Kadi ne bwakàne yéyè neàlumbulwishè bapèle, ne neàkandameenè bubi bwàbò bwa bapòlè bàà pa buloba; ne yéyè neàtuutè buloba ne dikombo dya mukana mwèndè, ne ne mupùuyà wà ku mishikù yèndè yéyè neàshebeyè beena lwonji.

Baakàne nebàdisenyè mufungu wàbò, ne beena lulamatu nebàdiswikè mukàbà wà mu cifukà cyabo.

Ne mbwa wa diitu kabidi neàsombelè pàmwè ne mwànà wa mukooko, ne nkàshààmà neàlaadilè panshi pàmwè ne mwànà (ki mbuji awu); ne kànà kàà ngombe ne kànà kàà ntambwe ne bimunà bya maanyi. . . anyi kànà kàà ngombe, anyi nyama wa ntambwe ne bimunà bya maanyi kaaba kàmwè; ne mwànà mutekète neàyilombòlè.

. . .ngombe ne nyama wa ours nebiduilè pàmwè; . . . twànà twàyì (ne) netùlaadilè panshi kaaba kàmwè, ne nyama wa ntambwe neàdye bisoosà anu müdyadyà ngombe amu.

Ne mwànà wa ku dibèèle neànayilè pa bwinà bwa nyòka wa dicyulà, ne mwànà mulekeesha dibèèle neèlè cyanza cyèndè mu bwinà bwa nyòka wa mpaapija.

Kabyàkwenzelangana bibi anyi kubutulangana mu mikunà yànyì yònsò ya cijila ayi nansha, bwalu buloba nebwikalè bùle tètè ne dimanya. . .anu mùdì màyi mabwikile mbù amu.

Hum! Amu's mmu Yelusàlèma Mupyamùpyà amu's. "Wa mupyamùpyà" awu. *Ditamba*, kaaba aka, nditèèdiibwe, bu Ditamba dya Davidi. "Yèyè ùdi byònsò bibidi Ditamba ne Mùtòlokù wà Davidi."

¹³³ Mpindyewu, paanyimà pàà eci, Mukàji-musèla ùdi ùmwènèka. Paanyimà pàà mbingu makumi mwandamutekète, Mukàji-musèla ùdi ùmwènèka mu Bwàkabuulwibwà nshapità wa 19, mvensà wa kumpàla ne wa 16. Ùdi ùfika ne Mubàki Wendè, Mfumu wa bukole. Kaa, ekelekele! Ncyèna mumanye ní twacyàngata cyònsò anyi to. Tudi naaci anu bwa . . .

Ee, twánjàayi anu kubala citùpà cyà cyòci eci, nansha bishi. Ki pàafikà Mukàji-musèla mpòpò apa, paanyimà pàà cyòci eci. Nwamònu anyi? Paanyima pàà Bukalenge bwa bidimu cinunu bumanè kajaadikiibwa, dîbà adi Kilisto ùdi wàlukila ne Mukàji-musèla. Cya bushuwa, 1 too ne ku 16, wa nshapità wa 19.

Ne paanyimà pàà maalu aa . . .

Paanyimà pàà Dikenga dinene edi; paanyimà pàà Makènga; paanyimà pàà Bitampi; paanyimà pàà Bipùpù; paanyimà pa diipaciibwa dya Sàtaanà; paanyima pàà dijaadikiibwa dya Bukalenge bwa bidimu cinunu. Tàngilàayi!

. . . paanyimà pàà maalu aa ngákumwva . . . dîyì dya bantu bàabúngì mu dyulu, bamba ne: Aleluuyah! Lupàndu, ne butùmbi, . . . luumù, . . . bukòlè, kùdì Mukalenge Nzambi wetù,

Bwalu dilumbulwisha dyebe ndya lulamatu ne dyakàne, bwalu yèyè wàkamana kulumbulwisha mukàji munene wa masandi awu, uwva unyanga buloba ne masandi èndè awu, ne wàmanyi kusombwela mashi a basadidi bèndè ku cyanza cyèndè.

Ne kabidi yèyè . . . bóbò . . . Ne bóbò bàakamba kabidi ne: Aleluuyah! Ne mwìshì wèndè wàkabànda muulu bwa kashidi ne . . . kashidi.

Ki ekeleeziya-ndumbà wa kale nyèyè awu, "mwìshì wèndè wàkabànda muulu."

Nenku bakùlù makumi abidi ne banaayi abu ne nyama yinaayi ayi bàakapòna panshì ne bàakakuukwila Nzambi uwva musòmbè pa nkwasà wa butùmbi awu, bamba ne: Amen! Aleluuyah!

Ne dîyì adi dyàkapàtukila mu nkwasà wa butùmbi, dyàmba ne: Tùmbishàayi Nzambi wetù—Tùmbishàayi Nzambi wetù, nwènù basadidi bèndè bònsò, ne nwènù bàdì bà mucìina, ne bakese ne banene.

Nenku ngákumwva byenzè bu ne cìvwa ndîyì dya musùmbà munene, . . .

Tèelejàayi! Ki bwalu abu's, Ekeleeziya. Paanyimà pàà Yèyè mumanè kubànda mu nshapità mwi3, ki Yèyè ulwàlwa ewu. Nwamònu anyi? Nenku mvensà mwi6 mpindyewu.

Nenku ngákumvwa byenzè bu ne civwa ndiyi dya musumbà munene, ne bu diyi dya máyi ábúngì, ne bu diyi dya mukungulu mukole, dyamba ne: Aleluuyah! bwalu Mukalenge Nzambi wa ngulu yònsò udi ukòokesha.

Aleluuyah! Tàngilàayi! Dibàkà dya Mwànà wa mukooko didi dilwa mpindyewu. Ki Mukàji ulwàlwa ewu.

Tùsankàayi ne tùcyonkomokàayi, ne tùmupàayi luumu, bwalu dibàkà dya Mwànà wa mukooko dyáfiki, ne mukajèndè wàmanyi kudìlongolola. (Ki Yèyè ulwàlwa ewu, bònsò babidi, Mukàji-musèla ne Mubàki.)

Ne mukaji bàakamupà bwa kuvwàlayè cilàmbà cya linà mufinùnùke, cikezùke ne citòòke, bwalu cilàmbà cya linà mufinùnùke cidi. . . mbwakànè bwa bansantu.

Nenku yèyè wàkangambila ne: Fùnda ne: Bàà disànka ng'aba bàdi babìkidiibwe ku didyà dya dibanji dya Mwànà wa mukooko. Ne yèyè wàkangambila ne: Aa àdi. . . mèyi malelèlè a Nzambi.

Ki mèmè kupòna panshì ku makàsà èndè bwa kumukuukwila. Ki kungambilayè ne: Údìlamè bwa kwènji nanku to; mèmè ndi musadidi neebe, . . .bànà beenu ne bàdi ne . . .bànà beenu ne bàdi ne bujaadiki bwa Yesu, kuukwilà Nzambi, bwalu bujaadiki (bwa Kilisto) bwa Yesu bìdi nyuma wa ciprófeta.

Nenku nàkamòna dyulu dyunzulula, ne . . .kabalù katòòke; . . . (kaa, ekelekele!) . . .ne ewu uvwa musòmbepù . . .uvwa ùbìkidiibwa ne ng'Wa lulamatu ne Mulelèlè, ne . . .ùdi ùlumbulwisha ne bwakàne ne ùlwangana mvità.

Ne mèsù èndè àvwa menzè bu ndimì ya kapyà, ne . . . mutù wèndè kùvwa bifulu bya butùmbi byàbúngì; . . .

Wàkaashiibwa cifulu cya butùmbi bu nganyi? “Mfumu wa bamfumu.”

. . .ne yèyè uvwa ne dinà difùnda, divwà muntu nansha umwe kàyi mumanye to, pa kuumusha . . .yèyè mwine.

Ne yèyè uvwa muvwàle cinkutu citòòke cizabika mu mashi, ne dinà dyèndè didi dibìkidiibwa ne Diyì dya Nzambi.

“Ku cibangidilu kwàkadi Diyì, ne Diyì dyàkadi Nzambi. Ne Diyì dyàkavwijiiibwa mubidi ne dyàkasòmbela munkaci mwetu.” Divwa Nganyi? Yesu.

...ne dînà dyèndè dîdî dîbîikidiibwa ne Dîyî dya Nzambi.

Ne bilwîlu bivwà mu dyulu bivwa byènda bimulonda pa tubalù tutòoke, bavwàle bilambà bya linà mufinùnùke, bitòoke ne bikezùke. (Butùmbi's wè! Ki Yèyè ulwàlwa ewu.)

Ne mukana mwèndè mùdî mùpàtuka mwelè wà mvità mutwè, wùdî...ne bwa kutuutawù ditùnga; ne... neàbàkòòkèshè ne dikombo dya cyamu; ne yèyè ùdî ùdyata mu cikàminu lwonji lwà cîjî cîkolè cya Nzambi wa Bukolè bwònsò.

Ne yèyè ùvwa pa cinkutu cyèndè apu ne pa cibelu cyèndè ne dînà difùnda ne: MFUMU WA BAMFUMU NE MUKALENGE WA BAKALENGE.

134 Cìvwa ncinyî? Bantu Bèndè bacìvwa bàfùminakù ku diMwasa cifulu cya butùmbi bu Mfumu wa bamfumu, ne Mukalenge wa bakalenge. Wàlukila ku Ntempelu Wendè wa cijila, mwela maanyî a Bwikadi bwa Nzambi, bwa kusòmbelamù ne kukòokèsha mu Bukalenge bwa bidimu cinunu pàmwè ne Ekeleeziya Wendè. Amen! Dimwènèka, pàmwè ne Mfumu wa bukolè awu, bwa kwangata kaaba Kèndè ku luseke lwa Mubàki, Ntempelu mupyamùpyà wa bukalenge mwela maanyî.

135 Mpindyewu twipàcìla tusambombo twà Bwàkabuulwibwà 6.1 too ne ku Bwàkabalwibwà 19.21 tùlù.

136 Tèèlejàayi mpindyewu, bwa kujikija. Bitampì Mwandamutekète, Mpungi Mwandamutekète, Mpànzà Mwandamutekète, Makènga Asatu, mukàjî mu dîbà, diipata dya dyabùlù, anyî dya dragon mukunze, bìdî bìlwa pankacì pàà bikondo ebi mu cikondo cya Dikènga dinene. Kanùbipu mwoyi to. Bintu byònsò ebi bìdî byènzeka munda mwa cikondo aci.

Kadi twipàcìlà tusambombo twa dilwa Dyèndè ntwòtò etu. Nudi nuçitabuuja anyî? Cikondo kaayi cya butùmbi cidî citèèkîibwe mu cibùcìlu bwa aba bàdî banangè Mukalenge's wè! Ndi nkwabîlwa's, wèwè mulunda wanyî, katwèna mwa kupanga kumòna aci to. Kùcìpangidìkù to, cyùdî wenza nansha ciikàle cinyî. Ikàlà mutwîshîibwe!

137 Mpindyewu, mu dyàlumingu dilwalwà, bu Mukalenge mwa kwanyîsha, ndi muswe kuleeja, bu Yèyè mwa kunkwàcîsha, kuleeja anu menemene mwaba wùdî dyònsò dya ku matùkù mwandamutekète awu, mwaba wùdîwu menzèkèle, mwikàle ntwàla cintu cimwecimwe—cimwecimwe cîngènjî leelu ewu eci, ne kuleeja misangu mwandamutekète ayi, mbingu mwandamutekète, mbingu makumi mwandamutekète mu mwaba mene wà ntempelu wa beena Yudà awu, ne kuleeja anu menemene mwaba wùtùdî twètù ne mwoyi ku ndekeelu eku, bu Mukalenge mwa kwanyîsha.

138 Nudi baMunangè anyi? [Disangisha didi dyamba ne: “Amen.”—Muf.] Nudikù bafwànyine kutwàla bwa kupangila Dyulu anyi? [“To.”] Tudi ku cikondo cya nshìikidilu!

CidìYe ùlwa kwenza ncinyi? Cintu cya kumpala cyènzeka, kumpalà kwa Yesu kulwaYè pa buloba, cintu cya kumpalà ciikalàku ncinyi? Ekeleeziya neikalè (cinyi?) mwambwibwe! Yesu nealwe pa buloba ne wènda wènda too ne ku lukità, wèla papa ne maman mwoyi ku cyanza, wàkula neetu bõnsò kaaba aka, kadi ùbànda ùya anyi? To!

Nebiikalè bishi? Nenku... Tudi tunwàmbila cyòci eci, ku—ku Diyì dya Mukalenge ne: “Twètù bàdi ne mwoyi ne bashààle...” Teesàlònìkà Mwibìdì, nshapità mwi5: “Twètù bàdi ne mwoyi ne bashààle too ne ku Dilwa dya Mukalenge, katwàkucyàmakana anyi kupangisha bàdi balàale tulù to. Bwalu mpungi wa Nzambi neadilè; bafwè mu Kilisto nebàjuukè dyàmbedi; ne twètù bàdi ne mwoyi ne bashààle netwàmbwibwè pàmwè naabò bwa katwilangana ne Mukalenge mu mpeepèlè.” Netwàngaciibwè mu katanci, mu mubùnyì wà dîsù. Mu cyòci cikondo aci, aci cidì cijikija Cikondo cya Ekeleeziya.

139 Pashìishe, pànu pa buloba Nzambi ùdi ùbanga kukwàta mudimu ne beena Yudà. Nekwikalè bapròfetà babidi. Nshapità wa 11, netwàngatè cyòci aci. Bapròfetà beela maanyì babidi, bu Eliyà ne Mòsà, bàndì mèmè ngeela meeji ne mbòbò. Ne bòbò nebàtwalè milawa minene, paanyimà pàà bamanè kumòna ne bààmányì kudyènza cimùkù, ne Loomò mushipè cipungidi cyèndè, mfumu awu.

Munkaci mwa lumingu lwa makumi mwandamutekète elu, neàshipè cipungidi cyèndè ne Loomò, anyi Loomò neacìshipè ne Izaleela, ne necyènzè ne cinyangu cìbangè kutangalaka. Ne nekwikalè dipaasalala dinene, piikalà bàshàadilè bàà Bisàmbà bya bendè, baavirgo bakùtākāne... Dragon awu, Loomò, wàkapwidija màyi a mukana mwèndè, bwa kwela bàshàadilè bàà dimiinu dya mukaji bàdi balamè mikenji ya Nzambi abu mvità. Loomò ngwènza cyòci aci.

140 Nsangilu wa maèkèleeziya neàbàswikè cimùkù, ne neàbwejè beena Yudà mu mwine nsangilu ewu, ne neàbàlùjè cyàkàbidì ku dikuukwila dya mu ntempelu wabò sungasunga, mu EMU MMÛDÌ MUKALENGÈ WÀMBA wa mu Bible, nenku nebiikalè ne ekeleeziya wabò sungasunga.

141 Bàdi cinyi mpindyewu? Ndi mfùma ku dicibàkula mpindyewu mene. Ncipyacìpyà. Bàdi mpindyewu ditùnga, dimanya. Mmwómò anyi? Kadi kí mbanji kwikala ne dikuukwila dyabo dya mu ntempelu to. Kadi pàatèekàbo dikuukwila dya mu ntempelu, Ekeleeziya neikalè mumanè kuya. Nzambi neikalè ùkwàta mudimu ne beena Yudà bu ditùnga. Nenku pàabwejiibwàbo mu nsangilu ewu, Loomò neacìshipè munkaci mwa cidimu cya makumi mwandamutekète, bidimu bisatu ne

citùpà, yéyè neàshipè naabò cipungidi aci, ne neàjuulè cinyangu aci cidi cyènza bwa kabùtu kutangalakakù too ne ku dikùmbana dya maalu ònsò. Pashìiyè yéyè neàngatè ne beena Mishòònyì, ne beena Yudà, ne neàbàkèngèshè. Mu cyôci cikondo aci, bapròfetà babidi aba nebàjuukè ne nebèlè buloba mulawu, bwa mvula kàlòkupù to munda mwa matùkù a cipròfetà cyabo awu. Ne bôbò nebàbiikile Kapyà bwa kufùmakù mu Dyulu, ne bikwabo byònsò. Indilaayi anu cyanààna. Tudi naabi bùngì cyanààna kaaba aka, bitùtèekela mu diyeebà, bya diyiila.

142 Kaa, Yéyè's n'Nzambi munene wa dikèma's! Taatu wa luse kaayi! Balunda bàanyi, lekèlaayi ngàmbe nunku, mèmè bu mpaasàtà wenù. Kanwèna bamanyè dyèsè dinudi naadì mu nsòmbelu wenù to. Kanwèna bamanyè to. Kùdi bantu banene bààbùngì, kùdi bansantu bààbùngì, kùdi binunu bya bantu bàà cijila bàdi bafwè mu bidimu byà kale, bantu bùle tètè ne Nyuma bàvwà bafwànyine kwikala banangè kumòna ditùkù dinùdi nwénù ne mwoyi edi. Nwénù ne mèmè tùbwelelààyikù pa cyôci aci.

143 Cikwabo cidi cikèngela bwa twètù kutàngilakù ncinganyi? Ncinyì citùdikù mwa kwenza paanyimà pàà cyôci eci? Kutùyaayà nkwepi? Cìikalà mwa kwenzeka ncinyì? Bìkèngela tuye mwaba kampànda. Kwèna mwa kushààla apa díbà dyònsò to. Udi mwa kukòsa mashìndà èbè; lumingu lùdì lùlondà bikèngela àkoshiibwè kabidi; eyowa, misangu yibidi, kumpàlà kwa diine díbà adi. Udi mwa kukolesha bàna beebe. Udi ubàdiisha cyàkudyà cya mundaamuunya; pa díbà dya cyàkudyà cya dilòòlo nzala yibàsùma cyàkàbidi. Ubàdiisha cyàkudyà cya dilòòlò; nzala yibàsùma kabidi pàdìbu bùcya mu dinda. Udi umusùmbila mukòlò wà bisàbaatà; bôbò biikàle mùdi bàanyi mèmè aba, ngondo mitwè ku yibidi anyì yisatu udi umusùmbila mukòlò mukwabo wà bisàbaata. Wèwè mumùsùmbile bilàmbà ngondo ewu; mu ngondo umwe anyì yìbidi udi umusùmbila bilàmbà bipyàbìpyà. Nwamònu anyì? Kakwèna cintu cidi citungunukà to nansha cimwe. Kakwèna cintu nansha cimwe cya cishindàme to. Kakwèna cintu nansha cimwe cidi mwa kushààla to.

Kwàlakanyi mabanji a pàtùpù a pa buloba ebu
to,
Àdi ànyangukà lùkàsà aa,
Ibàkilà ditèkemena dyebe pa bintu bya
Cyendeleele,
Byôbì kabyàdyàkujìminakù to!

Bikondo mbyùle ne dishintuluka dya
cìmpicìmpi,
Cintu nansha cimwe pa buloba kacyèna mwa
kushààla kaciyi cinyungishiibwa to,

Ibàkilà ditèkemena dyebe pa bintu bya
Cyendeleele,
Kwàta ku cyanza cya Nzambi cidi kaciyi
cìshintuluka!

Kwàta ku cyanza cya Nzambi cidi kaciyi
cìshintuluka!
Kwàta ku cyanza cya Nzambi cidi kaciyi
cìshintuluka!
Ibàkilà ditèkemena dyebe pa bintu bya
Cyendeleele,
Kwàta ku cyanza cya Nzambi cidi kaciyi
cìshintuluka!

Tèèlejàayi:

Pààjikà lwendu lwetu, (Yêyè neatùmanyishe
dìbà dyàjikàlu.)
Byôbi ne tuvà ne lulamatu kùdì Nzambi,
Cisòmbedi cyetu cilenga ne cya cibàlakana mu
Butùmbi aci, (Cimenga cyela maanyì aci.)
Musùuka wètù mwambwibwe newùcimòne!

Kwàta ku cyanza cya Nzambi cidi kaciyi
cìshintuluka!
Kwàta ku cyanza cya Nzambi cidi kaciyi
cìshintuluka!
Ibàkilà ditèkemena dyebe pa bintu bya
Cyendeleele,
Kwàta ku cyanza cya Nzambi cidi kaciyi
cìshintuluka!

Kwàlakanyi mabanji a pàtupù a pa buloba ebu
to,
Àdì ànyangukà lùkàsà aa,
Ibàkila ditèkemena dyebe anu pa bintu bya
Cyendeleele,
Byôbi kabyàdyàkujiminakù to!

Kwàta ku cyanza cya Nzambi cidi kaciyi
cìshintuluka!
Kwàta ku cyanza cya Nzambi cidi kaciyi
cìshintuluka!
Ibàkilà ditèkemena dyebe pa bintu bya
Cyendeleele,
Kwàta ku cyanza cya Nzambi cidi kaciyi
cìshintuluka!

Patùdì twinyika mitu yetu apa, pawikalà kacya kùtukù
mwanji kukwàta ku Cyanza Cyèndè to, kwènàku anu mwa kulwa
kucikwàta mpindyewu anyi?

Kwàta ku cyanza cya Nzambi cidi kaciyi
 cishintuluka!
 Ibàkilà ditèkemena dyebe pa bintu bya
 Cyendeleele,
 Kwàta ku cyanza cya Nzambi cidi kaciyi
 cishintuluka!

144 Wèwè mwànà wa bakàji mutekète, ùdi kansongàakàji kakese kalenga mpindyewu. Tusukì twebè ntulenga, tutàmà twebè ntwenzè bu twa rose. Kadi, udi mumanye, s'anu leelu ne mààlabà ewu, twòtu atu, netùfwatalalè. Tudi bamanyè munyi ní lumingu lwàlwà biinyà kabyàkwikala bidya, mu buloba, twine tutàmà tulenga, tukese, twa rose atu?

145 Mwaneetu wa balùme mutekète, wèwè udi ne dikandà, munene, ne mahùndà makolè; udi ne mwoyi wùzùka bikolè. Kadi paanyimà pàà cikondo, anu mààlabà ewu, nsukì milenga ya mvwàngalà ayi, neyitùuke, ne tukese tuwàshààla naatù atu netwàndamukè mvyà. Makaaya manene malulàme awu, neàkobamè, ne biinyà nebidye mu mabòkò ne mu misunya amu. Nebàkwambùle bàye neebe, bàkwele mu lupwishi.

Pa nanku, ibàkilà ditèkemena dyebe pa bintu
 bya Cyendeleele,
 Byòbi kabyàdyàkujìminakù to!
 Kwàta ku cyanza cya Nzambi cidi kaciyi
 cishintuluka!
 Kwàta ku cyanza cya Nzambi. . .

Ndi muswe wòlolè cyanza bwa kulenga ne kupeta cyanza
 Cyèndè mpindyewu.

Ibàkilà ditèkemena dyebe pa bintu bya
 Cyendeleele,
 Kwàta ku cyanza cya Nzambi cidi kaciyi
 cishintuluka!

Pashiishe pààjikà lwendu elu, (lwàdyàkujika,
 dîngà ditùkù.)
 Byòbi ne wèwè uvwa ne lulamatu kùdi
 Nzambi,
 Cisòmbelu cyebe cilenga cya cibàlakana mu
 Butumbi aci,
 Musùkà wèbè mwambwibwe newùcimònè!

Bwa cinyi kùyikù ukwàta ku cyanza cya
 Nzambi cidi kaciyi cishintuluka!
 Kwàta ku cyanza cya Nzambi cidi kaciyi
 cishintuluka!
 Ibàkilà ditèkemena dyebe pa bintu bya
 Cyendeleele,
 Kwàta ku cyanza cya Nzambi cidi kaciyi
 cishintuluka!

146 Mémè nkààdiku mumòne bintu byàbûngì, bidimu bitwè ku makumi asatu ne cimwe mu cyambilu emu. Nkààdiku mumòne bintu bya dibungama; nkààdiku mumòne bintu bya butùmbi. Cintu cya citàmbe kwikala cya dibungama cínkaadiku mumòne kacya bândela... Nansha múnkaadi mumòne bânà báfwa ne nzala mu mùsèsù; nkààdikù mumòne baamaamù balòmba kàà pa luse kàà kapesse kamwe kàà dyâmpà. Cintu cya citàmbe kwikala cya dibungama cínkaadiku mumòne, nkumòna muntu, muntu wetù ewu, uvwakù ne cya kwikala mwànà wa balùme wa Nzambi, ùfwa kàyi mumanye Nzambi to.

147 Ndi mvùluka muntu mukàji mwimàne ku ciibi dilòlò kampànda, ku ciibi cya ekeleeziya ewu, ùseka. Kwambayè ne: “Ncyènàku mufwanyine kulekela wanyi ngombe mémè bwa kwikalayè ne ntèndeleeleu wa bwena udiyè nendè yèyè awu nansha!” Dìbà dimwepele ndile, kumbùkishabò ku lùpitaadi. Mukàji mulenga kumòna’s, wa bidimu bitwè ku makumi abidi ne bibidi, ùvwa wèla mbilà mikolè ne: “Lwâyi ne muyiishi awu kaaba aka!” Ùvwa mwena Katolike, ku diitabuja.

Pângàakayàku, mwaneetu wa bakàji mukùlumpè awu kwambayè ne: “Wáfiki pashiishe mupicishe, Mwaneetu Branham. Mmufwè kùkaadi tusunsa tutaanu.”

Mémè ne: “Ndikù mwa kumumòna anyi?”

Yèyè ne: “Ùvwa wèla mbilà mikolè ùkukèba, mu mèyi èndè a ndekeelu ne: ‘Kangàtaayi muyiishi awu, Mwaneetu Branham awu!’”

Bàyendè ùvwa mwaba awu, wèla mikunda ne: “Mwenzèlèku disambila’s! Enzàku disambila’s!”

Mémè kwamba ne: “Dìbà ndimane kupità bwa mpindyewu.”

148 Mémè kupwekesha mbùlankète. Ùvwa ne mèsù manene menemene mafikùlùke. Mukàji mulenga kumòna; ne tuntòbengèlà tukese tukese lwà kwìsù kwònsò eku; ne nsukì ya cisengàsengà; ùkoka ntema be. Ùkaavwa mutàte bikolè mu mushindu wà ne tuntòbengèlà atu tùkaavwa tumwenzè bijùji kwìsù aku bu mpùsù. Mèsù èndè àvwa madyundè mapàtùke ne mu bimpòkòmpòkò byàwù, nunku ewu. Ne, mu bushuwa bwa bwalu, mala èndè ne twonyi bikaavwa bivundùlùke, bìdì mu—mu... Muntu yònsò ewu ùtu wènza aci pàkaadiye ùpunga ne lufù, bantu pàmwè ne bònsò. Nenku ki yèyè awu, mulàadika mu mushindu awu, ne mukana mulekelela. Ne bilàfinyi byèndè ebi, bivwa bibwikile ndambu citùpà cya cifiikùlùke cya mèsù aci. Mémè ncyàdyàkucipwakù mwoyi to. Ki musambu awu kumvwilawù mu meeji ne.

Kwàlakanyi mabanji a pàtupù a pa buloba ebu to. (Bulenga bwa kwìsù, bintu bya mikùùkùku).

149 Nkààdikù mwimàne ku luseke lwà muntu mulùme kampànda anu mu Port Fulton emu, ùpunga ne lufu. Kumbiikidishabò ku luseke lwà bulààlù bwèndè. Kadi ngâkasambilakù nendè ku cyoshelu eku dilòòlò kampànda. Úvwa mwelè mukàji kampànda dibòkò kunshingù. Mémè kwamba ne: “Umùshà dibòkò kunshingù kwa inábànzà awu.”

Yéyè ne: “Ndi mmulombola kùdi Nzambi.”

150 Mémè ne: “Kí nne dibòkò dyebe dimwela kunshingù to.” Mémè ncitu ngiitabuuja bintu bya mushindu awu to. Kumfiikilayè munda. Kupátukayè pambèlu wènda útwa mikùmà.

Mémè kuya kùdiye, pashiishe ndambu, pàkaavwàye ùpunga ne lufu. Kuntàngilayè mumpàla, kwambayè ne: “Kùnsambididi to, Mwaneetu Bill. Ndi mujimìne. Kwànyì nkumanè kujika.” Yéyè ne: “Byònsò bínkaadiku mupetè abi, mbiyè.”

151 Mvwa mwimàne anu lwà pambèlu apa mu disangu, katanci kîpi ndambu ne kaaba aka, dîngà ditùkù, kwa muntu mulùme kampànda uvwa mumbiikidishè ku luseke lwà bulààlù bwèndè pàkaavwàye ùpunga ne lufu. Yéyè ne: “Mvwa mémè misangu yònsò anu muswe *bikampànda ne bikansanga ne bikankèngà*, ne *bikampànda*.” Yéyè ne: “Kadi kacya ncitukù mukwàcile Mukalenge mudimu to. Misangu yábungì ntu anu ndikànda bwa kuya ku cyoshelu.” Yéyè ne: “Mwaneetu Branham, sambilàku bwa Nzambi ènzèku bwa mwanàànyì mukese wa bakàji wáfutakù cibawu cya bintu bìndi mémè mwenzè abi. Pàmwäpa yéyè ùdikù mwa kwenza cintu kampànda bwa Mukalenge.”

152 Mémè kwamba ne: “Aci kacýena mwa kwenzeka to, mwaneetu. Bintu byúvwa mwa kwikala wèwè mwenzè abi mbijimine.” Hum!

153 Ngâkiimana ku luseke lwà muntu mulùme kampànda, kumumòna ùlwangana mvità ne baadémons munda mwa mēbà makumi abidi ne anaayi. Wamba ne baadémons bāvwa biimàne ku luseke lwà bulààlù bwèndè ne mìnýòòlòlò midjìngila munshingù. Kwambayè ne: “Kabànkwàcìkù to!” Wèla mbilà mikolè; bàmulaminyina mu bulààlù. Kwambayè ne: “Nyéyè udi mwimàne wàwa. Kanwènaayikù mwa kucimòna anyi’s? S’ncyaci cyènda cìndonda.” Úkaavwa mulààdikijèlààdikije Nzambi, ntàntà mupitèpite bule. Úvwa ne mayeebà manene mùle tètè ne bisosà bya kwelela nyama, mùle tètè ne blé, ne tubalù tulenga twà mbilu ya dipiiyangana. Cidimu cimwe kumpàla kwa ciine aci, wàkeela Nzambi mulawu mumpàla, mutàpe mukàjèndè mapì ne bwalu ùvwa muyè mu tabernacle. Nudi bamanyè cyàkenzekà anyi? Nkùbà kutuutayè ku diyeebà dyèndè adi, ne kushebeyayè tubalù twèndè atu, kwosha bisosà byèndè bya kwelela nyama abi kubibùtula bùtùbùtù. Ki mulùmyànà awu kufwàye mpalù ya mushindu kampànda, ùlwangana bwa kuumusha baadémons pambidi pèndè.

154 Kadi mulunda wànyì kampàndà wa kale (butùmbi's wè!) mwimàne kuntu kwàka, kufikayè kundekeelu kwa njila wendè. Mémè kwamba ne: "Ukààdi uya anyì, papa?"

Yèyè ne: "S'ki lwendu elu, Billy."

Mémè ne: "Bìdi bìshi?"

155 Yèyè ne: "Bilenga be." Yèyè ne: "Lwâ ne bânà bàanyì ku luseke lwâ bulààlù eku." Kutentekelayè yònsò wa ku bânà bèndè abu tuubyanza twèndè twâ kale tutekètàngàne atu e kubàbèneshayè. Kwambilayè bânà bèndè babidi bàà balùme, kwamba ne: "Nkwàtaayi byanza, nùbìbàndishè muulu, mwàkenza Yoshùwà ne Kaalèbà amu." Tuvwa tudikonka cìvwàyè muswe kwamba's. Kwambaye ne:

Ditùkù dya disànka, ditùkù dya disànka,
Kacya Yesu wàkùpula mpekaatu yànyì!
Yèyè mmundongèshe mwa kutàbala ne
kusambila,
Ne kwikala ne nsòmbelu wa dicyònkómoka
ditùkù dyònsò.

Tudi ne bimwe bya ku bintu abi bya difikakù's, balunda bàanyì! Kakwènakù muntu nansha umwè udi kàyì ùjinga kudyà cyàkudyà cìmpè, kwendela mu màshinyi malenga a kàdyèndelandelà, kwikalakù ne bya bitàmbe bwìmpè bitùdì mwa kwikala naabi to. Ncyèna mmudyula yèyè awu to. Abi's mbìmpè. Nzambi mmuswe bwa wèwè kwikala ne byòbì abi, kadi:

Kwàlakanyi mabanji a pàtupù a pa buloba ebu
to,
Àdì ànyangukà lùkàsà aa,
Ibàkilà ditèkemena dyebe pa bintu bya
Cyendeleele.
Byòbì kabyàdyàkujìminakù to!

Twèlààyaaku byanza muulu mpindyewu patùdì twimba apa.

Kwàta ku cyanza cya Nzambi cìdì kaciyi
cìshintuluka!
Kwàta ku cyanza cya Nzambi cìdì kaciyi
cìshintuluka!
Ibàkilà ditèkemena dyebe pa bintu bya
Cyendeleele,
Kwàta ku cyanza cya Nzambi cìdì kaciyi
cìshintuluka!

156 Patùcìdì biimànyìne kuulu apa, tùkudimukàayi anu cyanàànà tùlabulèku muntu kampànda ku cyanza mpindyewu. Netwikalè mwa kutùngunuka, ne disangisha, mu katanci kakese cyanàànà. Kadi ndi muswe bwa nùkudimukè patùcìdì twimba cìkwabo citùminyì cya musambu awu apa.

Kwàta ku cyanza cya Nzambi cìdì kaciyi
cìshintuluka!

Enza nanku, taatù! Enza nanku, papa! Kùdì Nzambi!
Enza nanku, nsongà! Enza nanku, mwaneetu! Enza nanku,
mwaneetu!

Ibàkìlà ditèkemena dyebe pa bintu bya
Cyendeleele,
Kwàta ku cyanza cya Nzambi cìdì kaciyi
cìshintuluka!

¹⁵⁷ Kanwènaayikù ne disànka Bwèndè Yéyè anyi? Ambàayi
“Amen!” [Disangisha dìdì dyàmba ne: “Amen!”—Muf.] Bònsò
bàdì baMunangè, ambàayi ne: “Tùmbishàayi Mukalenge.”
[“Tùmbishàayi Mukalenge.”] Bònsò bàdì biitabuuja ne nenüye
ku Cimenga cya nseke yinaayi ya mwomumwe aci, elàayi byanza
muulu. (Shààla mucilamè nanku, katanci kakese, ne musambu
wèbè awu.)

Ndi mu njila mutàngile ku Cimenga cilenga
aci, (Bìyaaya bìshi mpindyewu?)
Cìdì Mukalenge mulongòlwèle Bèndè
Sungasunga;
Mwikalà bapikula bònsò bàà bikondo byònsò
Mwa kwimba “Butùmbi!” banyùngùlùkìle
Nkwasa Mutòòke;
Míngà misangu ntu ngumvwa majiyà a Dyulu,
Ne butùmbi búngààbandilàmu:
Disànka kaayi dìikalàci, pàngààmònà
Musùngidi wanyì,
Mu Cimenga cilenga cya ngòlò aci.

Kanwènaayikù banangè aci anyi?

Ndi mu njila mutàngile ku Cimenga cilenga
aci,
Cìdì Mukalenge wanyì mulongòlwèle Bèndè
Sungasunga;
Mwikalà bapikula bònsò bàà bikondo byònsò
Mwa kwimba “Butùmbi!” banyùngùlùkìle
Nkwasa Mutòòke;
Kaa, míngà misangu ntu ngumvwa majiyà a
Dyulu,
Ne masànka àngààbandilàmu:
Disànka kaayi dìikalàci, pàngààmònà
Musùngidi wanyì,
Mu Cimenga cilenga cya ngòlò aci.

Nudi baMunangè anyi? [Disangisha dìdì dyàmba ne:
“Amen.”—Muf.] Nanku:

Angàtâ Dîna dya Yesu wëndè naadi,
 Wèwè mwânâ wa tunyinganyinga ne dikènga;
 Nedikupè disànka ne busàmbi,
 Nda naaDi kwònsò kûyaayâ.

Dîna dya mushinga (Dîna dya mushinga!) Kaa
 dya bupòle be! (Kaa dya bupòle be!)
 Ditèkemena dya buloba ne disànkâ dya Dyulu;
 Dîna dya mushinga, (Dîna dya mushinga!) Kaa
 dya bupòle be!
 Ditèkemena dya buloba ne disànkâ dya Dyulu.

Mpindyewu, kanùpu mwoyi bwa mu dyàlumingu dilwalwâ
 mu dînda to, pa dîbâ citeema ne citùpâ. Nenku dîbâ adi
 netùteetè, bu Mukalenge mwa kwanyisha, bwa kujikija pa
 dîbâ, bwa twamòna mwa kwenza disambila dya babèèdi, mu
 dyàlumingu dilwalwâ mu dînda pa dîbâ citeema ne citùpâ.


Twinamina Dîna dya Yesu,
 Tupòna mikookwela ku makàsà Èndè,
 Mfumu wa bamfumu mu Dyulu netùMwasè
 cifulu cya butùmbi,
 Pààjikâ lwendu lwetu.

Dîna dya mushinga, (Dîna dya mushinga!) Kaa
 dya bupòle be! (Kaa, dya bupòle be!)
 Ditèkemena dya buloba ne disànkâ dya Dyulu;
 Dîna dya mushinga, (Dîna dya mushinga!) Kaa
 dya bupòle be!
 Ditèkemena dya buloba ne disànkâ dya Dyulu.

Anjì tèèlejàayikù anu citùminyi eci:

Twinamina Dîna dya Yesu,
 Bu ngabu ku butèyi bwònsò;
 Pààkujìngâ mateeta,
 Nungànâ anu cyanàànâ Dîna dya cijila adi mu
 disambila. (Aci ncyàmanâ bwalu's!)

Dîna dya mushinga, (Dîna dya mushinga!) Kaa
 dya bupòle be! (Kaa dya bupòle be!)
 Ditèkemena dya buloba ne disànkâ dya Dyulu;
 Dîna dya mushinga, (Dîna dya mushinga) Kaa
 dya bupòle be!
 Ditèkemena dya buloba ne disànkâ dya Dyulu.

Mpindyewu ndi ngaaluja bulombodi bwa disangisha kùdi
 mpaasàtâ, Mwaneetu Neville, bwa kwambayè mèyi èndè a dyoya
 naawù ne cyònsò cidiye mufwànyine kwamba aci. 

TWIPÀCÌLÀ TÛSAMBÒMBÒ TWÀ DIMWÈNEKELA
DYÀ DANYÈLÈ KÙDÌ NGABÛDYÈLÈ LUA61-0730E
(The Sixfold Purpose Of Gabriel's Visit To Daniel)

DILONDANGANA DYÀ MALONGESHA PA MBINGU MAKÛMÌ MWANDAMUTEKÈTÈ YÀ DANYÈLÈ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu dilòlò, mu matùkù 30 a ngondo wa mwandamutekète, cidimu cya 1961, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org